

Leeter masa Pawl ma wuzlalatara a Rawma hay Mey da ray Leeter ngada Rawma hay

Pawl ma wuzlala leeter keɗe na, ta daw aa berney nga Rawm daa ba arañ. A wuzlala na, daa masa anga daa mepəkey anga nga dey maakar. A wuɗey nga daw a Rawm nga vɔltar gɔɗarj a ndəhay fetede. Fa dɔba ha, a wuɗey ndəhay da Rawm a jənmara nga daw aa hwayak mekele. A wuzlala leeter e na, da way Gayus da Kwarinti (16.23). Ara Febe, ngwas ma jənta ndəhay daa mecəmey-ray nga ndəhay nga Yesu da Senkəre, slala masa gweegwe ta Kwarinti, ma handa leeter e a Rawm (16.1-2).

Daa leeter e, Pawl a wuzlalar da ray meesərkedey anga da ray Yesu. Da ndaw a wuɗey nga njey maaya fa mey nga Gazlavay na, si a pa Yesu nga ndaw anga fara fara gway, ba na, cek mekele daa ba (1.17).

Daa mecəmey-ray nga ndəhay nga Yesu da Rawm na, Jəwif hay daha, asaya, ndəhay masa Jəwif hay ba hay daha. Jəwif hay a fa səpmara kwakwas ata cənga. Ndəhay mekele mekele a wulkam ndəhay masa Jəwif hay ba hay si a səpmara kwakwas nga Jəwif hay may. Pawl a ləvey, kwakwas nga Jəwif hay na, a ləhey ndaw ba. Nga ləhey na, si ndaw a tɔba mey nga Yesu ta gɔɗarj nga Mesəfney nga Gazlavay. Ara daa fasəlawal 1 haa 8 Pawl maa guzley anda keɗe.

Daa fasəlawal 9 haa 11, Pawl a ləvey kwa har-gɔɗarj nga Jəwif hay a tɔbmara mey da ray Yesu ba na, a wulkey pas pal na, a tɔbmara la.

Daa fasəlawal 12 haa 16 Pawl aa guzley da ray menjey nga ndəhay nga Yesu daa Egəliz lej da wuzlah ndəhay da bəla. Pawl a ndəvda leeter e na, ta mecey-har a ndəhay ga.

Daa dferewel e keđe na, mey mekele mekele daha nga vəley gədanj a ndəhay:

Mey da ray meləhey daa mebərey (3.23; 6.23; 10.9)

Mesəfney nga Gazlavay a jənta ndəhay daa menjey ata (8)

Cek masa ndaw ma da hətər maja anja maaya fa mey nga Gazlavay (5.1-5)

Mey da ray menjey ta mewudfey-vaw (13.8-10)

Mecey-har

¹ Ara yah Pawl ma wuzlalakwara leeter keđe. Yah ndaw ma ka sləra nga *Yesu *Kəriste. Ara *Gazlavay ma walaya nga key *ndaw-meslərey nga Yesu, a paya nga wuzey mey anja maaya mawiya. ²*Mey-maaya-mawiya ha na, Gazlavay a ləvey dəga zleezle a da slərdərwa ta fa ndəhay ma təla mey anja. Mey nga ndəhay ma təla mey anja ha na, mawuzlalakaya daa dferewel nga Gazlavay. ³⁻⁴Mey-maaya-mawiya ha na, ara mey da ray Bay aləkwa Mahura Yesu Kəriste, Bəzey nga Gazlavay. A tərey nga ndaw-magədanj, a yawa daa səkway nga Bay *Davit. Ama Gazlavay ta wuzdərwa la fara fara, ara Bəzey anja masa ta gədanj daa masa anja ma sləkfdərwa daa meməcey ta gədanj nga Mesəfney anja. ⁵Gazlavay ta wuzdiwa maaya anja la ta fa Yesu Kəriste he. A paya nga ndaw-meslərey nga Yesu amba ya wuzdatara Mey-maaya-mawiya a ndəhay daa səkway hay wura wura

1:1 1.1 SNM 9.3-15; 26.16; Gal 1.15-16 1:2 1.2 3.21; 1Pi 1.10-12 1:3-4
1.3-4 Mt 1.1; 20.30-31; SNM 13.33; 2Tm 2.8

cəpa. Ya wuzdatara na, amba ndəhay a, a təbmara mey aŋga, a namar ray. Anda keɗe, ya fa həslar ray a Kəriste.

⁶ Akwar Rawma hay may, akwar da wuzlah ndəhay a ŋgene, maja Yesu Kəriste ta zəlkwar la ŋga tərey ndəhay aŋga hay.

⁷ Ya fa cakwar har, akwar ndəhay cəpa da *Rawm, akwar masa Gazlavay ma wudkwar kalah. Gazlavay ta zəlkwar la, ta tərɗakwar la ŋga ndəhay aŋga hay.

Anja Papa aləkwa, Bay Gazlavay, ta Bay aləkwa Mahura Yesu Kəriste ŋga pəsmakwar mey, asaya, ŋga njadamakwar daa zazay.

Pawl a wudɗey ŋga daw ŋga nəktərwa Rawma hay

⁸ Yaw, teesɗ na, ya fa kar suse a Papay Bay Gazlavay ta fa Yesu *Kəriste maja akwar tabiya. Ya fa kar suse he na, maja ndəhay da bəla tabiya fa zəldamakwar sləmay maja akwar ma təbmara mey ŋga Yesu Kəriste.

⁹ Gazlavay a səra, daa masa ya fa dərey dāŋgay na, ya fa sərɗadakwar. Ya fa kar sləra ta mevel pal daa masa ya fa wuzda *Mey-maaya-mawiya da ray Bəzey aŋga. ¹⁰ Ya faa cəɗa mandaw mandaw daa medərey-dāŋgay aɗaw amba a vəlya cəveɗ ŋga daw fa akwar anda aa ma wudɗey.

¹¹ Ahaw, ya wudɗey fara fara ŋga hətkwar fa dey amba ya vəlkwar gəɗaŋ ma sawa ta fa *Mesəfney ŋga Gazlavay. Anda keɗe, ka da hətam gəɗaŋ ma fəna ma fəna daa cəveɗ ŋga Yesu. ¹² Ya wudɗey ŋga ləvey na, ya da daw fa akwar a na, amba ya jənkwa vaw ŋga vəley gəɗaŋ da wuzlah aləkwa. Anda meləvey, ya da hətey gəɗaŋ maja akwar ma təbmara mey ŋga Yesu. Akwar may, ka da hətam gəɗaŋ maja yah ma təba mey ŋga Yesu.

1:5 1.5 11.13; 15.15-18; Gal 1.1; 2.7, 9 1:7 1.7 zazay: 5.1; 15.33; 16.20;
1Kwr 7.15 1:8 1.8 16.19; 1Tes 1.8 1:9 1.9-10 15.23; SNM 19.21; Ef 1.16

¹³ Məlma aɗaw hay, maaya na, ka sərmara ya ta wulkey la dey ga ŋga daw fa akwar, ama ya ta hətəy har ŋga daw daa ba araŋ. Ya wuɗfey ŋga daw fa akwar a na, ŋga kawa sləra ŋga jənkwar ŋga daw fa mey fa mey daa cəved ŋga Yesu anda yah ma jəntərwa ndəhay daa hwayak hay mekele mekele may. ¹⁴ Si ya wuzda Mey-maaya-mawiya a ndəhay tabiya, kwa ŋgada ndəhay daa berney hay ŋga Gərek hay, kwa ŋgada ndəhay daa slam hay mekele, asaya, kwa ŋgada ndəhay ta ləngesl ma səra cek, kwa ŋgada ndəhay ma səra cek ba. ¹⁵ Ara maja ŋgene, yah ma wuɗfey ŋga daw fa akwar Rawma hay may ŋga wuzdakwara Mey-maaya-mawiya.

Mey-maaya-mawiya aa ta gədaŋ ŋga ləhey ndəhay

¹⁶ Ya fa da zlurey ŋga wuzey *Mey-maaya-mawiya na, daa ba, maja Mey-maaya-mawiya aa ta gədaŋ ŋga Gazlavay ŋga ləhdata ndəhay ma pamara Yesu ŋga ndaw ata fara fara daa mebərey. Gazlavay a ləhey teesed na, ndəhay *Jəwif hay, fa dəba ha, ndəhay masa Jəwif hay ba. ¹⁷ Mey-maaya-mawiya na, fa wuzdərwa Gazlavay a nəkta ndəhay, ata maaya fa mey aŋga na, kwara. A da nəkta ndəhay, ata maaya na, ta fa ata ma pamara Yesu ŋga ndaw ata fara fara gway, ba na, cek mekele daa ba. Ara anda mawuzlalakaya daa ɗerewel ŋga Gazlavay, ma ləvey: «Ndaw masa maaya fa mey ŋga Gazlavay na, ara ndaw ma pa Gazlavay a ŋga ndaw aŋga fara fara. Anda keɗe, a hətəy heter mendəvey ba la.»

Ndəhay tabiya ata ta mebərey na, maja me?

¹⁸ Gazlavay da vaɗ fa cey mevel da ray mebərey ŋga ndəhay magədaŋ tabiya. Ata fa kam cek hay malamba

1:13 1.13 1Kwr 9.19-22 1:14 1.14 Kwa 3.11 1:16 1.16 2.9; SNM 13.46; 2Tm 1.8; 1Kwr 1.18, 24 1:17 1.17 3.21-30; fasəlawal 4; 10.4-13; Hab 2.4; Gal 3.9-12; Fəl 3.9; Heb 10.38

ɲgada ndəhay, a namar ray a Gazlavay ba səlak. Anda keɖe, Gazlavay a da katar sariya maja ata fa təkмата ndəhay siya ɲga sərey mey masa fara fara da ray Gazlavay. ¹⁹ A da sərdata banay maja cəved mawuzdakaya maaya maaya cay ɲgada kwa waawa amba a sərey cek da ray Gazlavay. Ara Gazlavay a, ray aɲga, ma wuzdatara cəved e fa mey ata. Ama ata ta səpmara cəved e daa ba. ²⁰ Fara fara, ndaw a gwa ɲga hətər Gazlavay ta dey ba, ama dəga aɲga ma ləma bəla haa wure keɖe, ndəhay a gwamara ɲga sərmara ta fa cek hay masa aɲga ma katərwa. Cek hay a na, fa wuzdərwa Gazlavay aa ta gədaɲ mendəvey ba ɲga sərmataw, asaya, aɲga Gazlavay Mawaca-waca. Anda keɖe, fa mey ɲga Gazlavay na, mey ata ɲga wurey amba Gazlavay a sərfatar dey-ceceh fa mebərey ata na, daa saba. ²¹ Ndəhay a fa sərmara Gazlavay na, daha. Ama a namar ray ba, a kamar suse ba anda ara Gazlavay ata ba. A wulkam na, a ray cek hay ɲga tede. Ata na, anda ata daa ləvaɲ maja cek maaya ta maaya ba na, a sərmara ba. ²² A pamara ray ata ɲga ndəhay ta leɲgesl ma səra cek, anja ara ndəhay manjar-leɲgesl. ²³ Gazlavay masa ta gədaɲ, ndaw masa ta dey ɲga sərmataw na, ata fa namar ray daa ba. Sasəkar a nam ray na, ɲgada cek mavəɖkaya ta bərey anda ndaw-magədaɲ masa ma da məcey jak. Asaya, a nam ray na, ɲgada cek hay masa ata ma vəɖmata ta har ata hay aa slam a ɲga ɖiyaɲ hay, aa slam a ɲga cek hay masa salay məfad leɲ aa slam a ɲga zezekw hay.

²⁴ Ara maja ɲgene, Gazlavay ma mbəkdata sem amba a kam cek hay ma ka hezey masa ata ma wuɖam. Anda keɖe, fa nəsmara vaw ata ta cek hay ma ka hwaray. ²⁵ Yaw,

1:18 1.18 2.5, 8; Ef 5.6; 2Tes 2.12 1:19 1.19-20 JƏW 12.9; Ps 19.2-5;
 SNM 17.27-28; 1Kwr 1.21 1:21 1.21 Ef 4.17-18 1:22 1.22 1Kwr
 1.19-20 1:23 1.23 Mew 4.16-18; Ps 106.20

ta mbəkdamara mey masa fara fara da ray Gazlavay sem amba a jəkam sləmay fa mey membərzley. A ragadam na, ɲgada cek hay masa Gazlavay ma katərwa jak, a namatar ray. Ama Gazlavay ta ray aɲga masa ma katərwa cek hay a na, ta mbəkdamara sem jak. Aɲga na, Gazlavay pal masa ndəhay ma da həlmamara ɲga sərmataw. *Amen.

²⁶ Ara maja ɲgene, Gazlavay ta mbəkdata sem amba a kam cek hay malamba ma ka hwaray anda ata ma wuɖam kalah daa mevel ata. ɲgusay a mbəkdamara meney ta zel hay anda maamandaw, a nam ta ɲgusay cəla ata hay. ɲgene ara cek malamba, ara cek ɲga key kəne ba.

²⁷ Zel hay may kəne, a mbəkdamara meney ta ɲgusay. A wuɖam na, si ɲga nam ta zel hay cəla ata hay. Zel a ney ta zel cəla na, ara cek ma ka hwaray kalah. Anda keɖe, fa handamawa banay ɲgada ray ata, təɖe ta sləra ata maaya ba ha ɲgene.

²⁸ Ndəhay a ɲgene ta wuɖam ɲga sərmara Gazlavay daa ba. Ara maja ɲgene Gazlavay ma mbəkdata sem amba a wulkam saw, a kam cek ta cəved e ba. ²⁹ Cek hay maaya ba daa mevel ata daha. Ata fa kam cek masa ta cəved e daa ba, fa sərdamata banay ta ndəhay, fa kam dey fa cek ɲga ndəhay, fa kam maagway, fa kam səleɲ, fa kəɖam ndəhay vagay, fa kam baazlam da wuzlah ata, fa kam wewer fa cek ɲga ndəhay, fa fəcam ndəhay. Asaya, ata fa slam mey a ray ndəhay, ³⁰ fa kam mbaɖa fa ndəhay, a wuɖmara Gazlavay ba, fa cəɖam vaw saw, fa zlapam, faa həmdamara ray ata. Mandaw mandaw ata fa səpam wewer hay mekele mekele ɲga key cek hay maaya ba a ndəhay. A namatar ray ɲgada papa ata hay ta mama ata hay ba. ³¹ Ata manjar leɲgesl, aa guzlam ta neneh cew cew, a wuɖam vaw pəreh, a səram dey-ceceh fa ndaw ba.

³² Ama, ata fa sərmarā, ndəhay ma kam cek hay maaya ba anda ŋgene na, Gazlavay a katar sariya la. Ndəhay anda ŋgene hay na, ata təde ŋga kədey vagay maja mebərey ata. Ta ŋgene he cəpa, fa kam cek hay malamba ma fəna ma fəna, asaya, aa həmdamata ndəhay mekele ma kam cek hay malamba anda ata.

2

Gazlavay a da katar sariya a ndəhay na, kwara?

¹ Jam adaw hay, da akwar fa mbəɸmatar ray a ndəhay na, mey akwar ŋga wurey amba Gazlavay a sərɸakwar dey-ceceh fa mebərey akwar na, daa ba, maja akwar ta mebərey anda ata may. Da ka mbəɸmatar ray a ndəhay na, a key ŋgene, ka mbəɸam ray ŋgada akwar ray akwar, maja akwar fa kam cek maaya ba letək anda ata. ² Ya sərkwā Gazlavay a key sariya la, a da sərdata banay ta ndəhay ma kam cek hay malamba. Sariya ŋga Gazlavay a na, ara ta cəved e fara fara.

³ Akwar ndəhay ma kam cek hay malamba, ka mbəɸmatar ray ŋgada ndəhay mekele ma kam cek malamba anda akwar na, ka wulkam Gazlavay a kakwar sariya ŋgaa zəɸdakwar daa ba daw? ⁴ Gazlavay na, ara ndaw maaya, a sərda banay ta ndaw fiyaw fiyaw maja mebərey aŋga ba. Aŋga fa ɸəsa mebərey a, kaa ka rəsmara Gazlavay a jak na, kwara? Aŋga ma kakwar maaya ŋgene na, amba ka mbəɸdamara menjey akwar, ba diya? ⁵ Akwar, ndəhay masa ray maŋgərɸakaya ŋgene, ka wuɸam amba ka mbəɸdamara menjey akwar ba. Anda keɸe, akwar fa cəhaɸamawa sariya ŋga Gazlavay ŋgada ray akwar ma fəna ma fəna. Yaw, ta pas masa Gazlavay ma da cey mevel a ray ndəhay ta mebərey fara fara na, a da

katar sariya tœde ta mebœrey ata. ⁶ A da pœlra mawurɓay a ndaw a, a ndaw a, tœde fa slœra maaya ta maaya ba masa anɓa ma ka.

⁷ Ndœhay masa ma sœpam nɓa key maaya mandaw mandaw na, a wuɗam Gazlavay a hœsɓtar ray, a nja-data aa slam anɓa mewedeɓey, a wuɗam nɓa hœtey heter mendœvey ba. Gazlavay a da vœlda heter mendœvey ba ha na, nɓada ata. ⁸ Ama ndœhay masa ma kam hœma a ray Gazlavay, ma rœsmara mey masa fara fara, ma sœpam nɓa key cek hay malamba mandaw mandaw na, Gazlavay a cey mevel la ga a ray ata, a sœrdata banay la.

⁹ Ahaw, ndœhay masa ma kam cek hay malamba na, a sœram banay la ga, a tœwam la. Ma da sœrey banay teesœɗ na, ndœhay *Jœwif hay, fa dœɓa ha, ndœhay daa sœkway hay siya tabiya may. ¹⁰ Ama ndœhay ma kam cek hay maaya na, Gazlavay a da hœsɓtar ray, a njadata daa zazay aa slam anɓa mewedeɓey. A da ka kœne nɓada ndœhay anɓa hay tabiya, teesœɗ na, nɓada Jœwif hay, fa dœɓa ha, nɓada ndœhay daa sœkway hay siya tabiya may, ¹¹ maja Gazlavay na, a weley ndœhay ta weley ba.

¹² Gazlavay ta wuzdara kwakwas anɓa la a *Mawiz. Da ndœhay masa ma sœrmara kwakwas a ba, a kam mebœrey na, ndœhay a, aa zœɗam la tabiya, ama a daa zœɗam na, maja kwakwas a ba. Jœwif hay na, a sœrmara kwakwas a. Ata may, da a zlœɓmara kwakwas a na, Gazlavay a katar sariya la anda kwakwas a ma lœvey. ¹³ Gazlavay a nœkta ndœhay, ata maaya fa mey anɓa na, maja ata ma cœndamara kwakwas a ta slœmay daada ba, ama maja ata ma kamara cek anda kwakwas a ma lœvey.

2:5 2.5 lz 2.11-21 2:6 2.6 1Kwr 3.13-15; 2Kwr 5.10; Ef 6.8; Mt 16.27 2:11
2.11 SNM 10.34; Kwa 3.25; 1Pi 1.17; Jak 2.1 2:12 2.12 Mt 7.21

¹⁴ Yaw, ndəhay mekele masa Jəwif hay ba, ma sərmara kwakwas ŋga Mawiz ba na, ta pas langar ata ray ata fa kam cek hay anda kwakwas ŋga Mawiz a ma ləvey cəŋga. Anda keḏe, kwa a sərmara kwakwas a ba na, ata fa sərmara ŋga key cek hay ta cəved e cəŋga. ¹⁵ Menjey ata na, fa wuzda Gazlavay ta wuzdatara kwakwas a sem, aa daa mevel ata. Asaya, ta pas mekele, mewulkey ata fa wuzdatara cek masa ata ma kamara maaya ta maaya ba. ¹⁶ Fara fara, pas pal Gazlavay a katar sariya la a ndəhay ta fa Yesu *Kəriste. Ta pas ŋgene, Gazlavay a da wuzdərwa mewulkey masa maḅadakaya daa mevel ŋga ndaw a, ŋga ndaw a. *Mey-maaya-mawiya masa yah ma wuzda na, fa ləvey kəne.

Jəwif hay a sərmara kwakwas ŋga Mawiz ba na, maja me?

¹⁷ Kaa akwar *Jəwif hay na, kwara? Ka ləvam akwar na, Jəwif hay, asaya, ka wulkam ka ləvam cek hay tabiya ata ta cəved e maja ka sərmara *kwakwas ŋga Mawiz, ka zlapam ka ləvam akwar ndəhay ŋga Gazlavay. ¹⁸ Ka sərmara cek masa Gazlavay ma wuḏey, asaya, kwakwas ŋga Mawiz fa wuzdakwara cəved ŋga sərey cek masa maaya ta maaya ba. ¹⁹ Ka wulkam na, ka gwamara ŋga wuzmatar cəved ŋgada ndəhay masa wulaf hay * daw? Asaya, ka wulkam na, akwar ndəhay ma waḏamatar dey a ndəhay masa daa ləvaŋ daw? ²⁰ Ndəhay ma səra cek ba na, ka wulkam ka gwamara ŋga kətmata la daw? Asaya, ka wulkam na, ka gwamara ŋgaa sərkadamata bəza hay

2:16 2.16 2.6; 1Kwr 4.5 2:17 2.17 9.4; Iz 48.1 * 2:19 2.19 wulaf hay, ndəhay masa daa ləvaŋ; Pawl a wuḏey ŋgaa guzley da ray ndəhay masa Jəwif hay ba masa ma sərmara Gazlavay ba.

2:19 2.19 Mt 15.14

† daw? Ka wulkam anda keḏe maja ka ləvam kwakwas ɲga Mawiz ta wuzdakwara cek hay sem cəpa ta fa mey masa fara fara. ²¹ Ehe, jəkam sləmay, akwar ndəhay masa maa sərkaḏamata ndəhay siya, kaa sərkaḏam ray akwar ba na, maja me? Akwar ndəhay ma kətmata ndəhay siya ɲga leley ba, kaa ka lalam na, kwara? ²² Asaya, akwar fa ləvmatar a ndəhay ka da lam vaw saw ba, kaa ka lam vaw saw saya na, kwara? Ka ləvam saya ka tam kuley ba, kaa ka lalamata cek hay da ver-kuley hay saya na, kwara? ²³ Akwar fa zlapam kalah, ka ləvam ka sərmara kwakwas ɲga Mawiz, ama akwar fa zləbmara kwakwas a saya na, kwara? Anda keḏe, a key ka pamar hwaray a Gazlavay. ²⁴ Ara anda mawuzlalakaya daa ḏerewel ɲga Gazlavay ma ləvey: «Ndəhay siya faa guzlam mey maaya ba da ray Gazlavay maja akwar Jəwif hay.»

²⁵ Akwar Jəwif hay, ka ləvam Gazlavay a sərkwar ta fa *mesley mandawal. Da akwar fa səpmara kwakwas ɲga Mawiz ta cəved e na, mesley mandawal a, a jənkwar la. Ama da akwar fa səpmara kwakwas a ta cəved e daa ba na, mesley mandawal a ara cek ɲga tede ɲgada akwar, fa da jənkwar daa ba. ²⁶ Anda keḏe, da ndaw mandawal manjar ɲga sley, a səpa kwakwas ɲga Mawiz ta cəved e na, Gazlavay a nəkā ndaw a anda ndaw maslakaya mandawal ba daw? ²⁷ Da ray ɲgene, ndəhay daa səkway hay mekele mandawal manjar ɲga sley masa ma səpmara kwakwas ta cəved e, a mbəḏmakwar ray la. A da mbəḏmakwar ray na, maja akwar Jəwif hay, akwar ta kwakwas akwar mawuzlalakaya, asaya, akwar fa slam mandawal, ama ta

† 2:20 2.20 bəza hay: Pawl aa guzley da ray bəza hay fara fara ba, ama da ray ndəhay masa ma sərmara mey ɲga Gazlavay maaya maaya ba araṅ. 2:21 2.21 Mt 23.3-4; Janj 7.19

2:24 2.24 Ez 36.20

2:25 2.25 1Kwr 7.19; Gal 5.3

2:26 2.26 Gal 5.6

ngene he cəpa, akwar fa zləbmara kwakwas a cənga.
²⁸ Ndaw a da sərey anğa ndaw Jəwif fara fara na, ta fa me?
 A da sərey anğa ndaw Jəwif fara fara na, ta fa cek masa
 ndaw ma gwa nğa hətər ta dey fa vaw anğa daada ba, anda
 meləvey, ta fa mesley mandawal daada ba. ²⁹ Ama ndaw
 Jəwif fara fara na, ara ndaw masa Gazlavay ma mbəɸdara
 mevel anğa sem. Ndaw maslakaya mandawal fara fara na,
 ara ndaw masa *Mesəfney nğa Gazlavay fa key sləra daa
 mevel anğa, ba na, ara ndaw masa ma səpey kwakwas
 mawuzlalakaya daada ba. Ndaw masa Jəwif fara fara na,
 ara ndaw masa Gazlavay maa həmda, ba na, ara ndaw
 masa ndaw-magədarj maa həmda ba.

3

Ndaw masa manjar mebərey na, daha daw?

¹ Da anda keɸe na, *Jəwif hay a fənmata ndəhay
 mekele fa mey nğa Gazlavay na, ta me? *Mesley man-
 dawal na, ara cek ma jəney ndaw daw? ² Ahaw, Jəwif hay
 a fənmata ndəhay mekele na, ta cek hay ga. Teesəɸ na,
 Gazlavay a vəldatara mey anğa na, nğada Jəwif hay a.

³ Fara fara, ndəhay ga da wuzlah ata fa təbmara mey nğa
 Gazlavay daa ba. Kaa Gazlavay na, a mbəɸda mewulkey
 anğa, a ka cek anda aa ma ləvey saba maja ata daw? ⁴ Kay,
 fa da mbəɸda daa ba. Kwa ndəhay tabiya fa mbərzlam na,
 Gazlavay a da ka cek anda anğa ma ləvey cənga. Ara anda
 mawuzlalakaya daa ɸerewel nğa Gazlavay ma ləvey:

«Kah, Bay Gazlavay, mey akah tabiya
 ara mey fara fara ta cəved e.

Da ndaw aa dəɸfaka mey na,
 ka gwa nğa wuzda ara mebərey akah ba.»

2:28 2.28-29 9.6; Jer 4.4; Fəɸl 3.2-3; Kwa 2.11 3:2 3.2 9.4; Ps 147.19-20

3:3 3.3-4 9.6; 11.29; Mesl 23.19; 2Tm 2.13 3:4 3.4 Ps 51.6

⁵ Da kwa ndəhay siya a da ləvam mebərey masa aləkwa ma kakwa fa wuzdərwa maaya ŋga Gazlavay na, ya da ləvkwa kwara? Yaa guzley kaa na, anda ndəhay magədaŋ maa guzlam may. Kaa da Gazlavay a sərdandakwar banay maja mebərey aləkwa na, ya gwakwa ŋga ləvey Gazlavay a na, fa key cek ta cəved e daa saba daw? ⁶ Kay, kəne ba! Gazlavay na, ara ndaw ma key cek ta cəved e. Da Gazlavay fa key cek ta cəved e daa ba na, kaa a da katar sariya a ndəhay ta cəved e na, kwara?

⁷ Da kwa ndaw a ləvey, mekey cek ta cəved e ba na, fa wuzdatara ŋgada ndəhay Gazlavay ara ndaw maa guzley mey fara fara, ŋga wuzdərwa gədaŋ aŋga. Da kəne na, Gazlavay a daa zəfdata ndəhay maja mebərey ata na, fa me dəba me? ⁸ Ndəhay siya fa ləvam: «Kakwa cek hay maaya ba amba ndəhay a sərmara Gazlavay na, ara ndaw maaya kalah.» Ahaw, a ləvam anda keđe ba, kwara? Kwa ndəhay siya na, faa guzlam maaya ba da ray adaw, a ləvam ya faa guzley anda keđe may. Sariya a təfdata ndəhay a la, təđe fa mewulkey ata maaya ba ha ŋgene.

Ndaw ma key cek anda Gazlavay ma wudəy na, daha daw?

⁹ Kaa wure keđe na, kwara? Aləkwa *Jəwif hay na, ya fənmatakwa ndəhay siya hay daw? Kay, ya fənmatakwa ba səlak! Ya ta wuzdakwara cay, ndəhay Jəwif hay ta ndəhay masa Jəwif hay ba cəpa na, mebərey fa fəntar ray. ¹⁰ Ara anda mawuzlalakaya daa dərəwel ŋga Gazlavay ma ləvey:

«Kwa ndaw masa maaya fa mey ŋga Gazlavay na, daa ba, kwa ndaw pal daa ba səlak.

¹¹ Kwa ndaw masa ta leŋgesl ma səra cek na, daa ba, kwa ndaw pal ma wudəy ŋga səpa

cəvedŋga Gazlavay na, daa ba.

¹² Ata cəpa ta mbəkdamara cəvedŋga Gazlavay sem.
Ata cəpa daa slam a ta mbədfmar dəba sem a
Gazlavay.

Kwa ndaw ma key cek maaya na, daa ba.

Kwa ndaw pal daa ba səlak.

¹³ Mey ma bawa da mey ata na,
maaya ba anda cəvay mawurkaya ma zey.

Neneh ata na, fa təknaata ndəhay kalah.

Ndovez ŋga mey ata na,
a kədfey ndaw vagay anda mewer ŋga zezekw.

¹⁴ Mey ma bawa da mey ata na,
ara mey meedfəwek e, ma nəsa ndaw.

¹⁵ Salay ata na, fa həldata ŋga wusey vaw fiyaw fiyaw
ŋga kədfey ndəhay vagay.

¹⁶ Kwa daa wura daa wura daa mepəkey ata na,
fa nəsam cek hay, fa sərdamata banay ta ndəhay.

¹⁷ Asaya, a sərmara ma handawa zazay
a wuzlah ndəhay ba.

¹⁸ Ata na, a zluram ta Gazlavay ba səlak.»

¹⁹ Ahaw, aləkwa fa sərkwa, cek hay tabiya masa *kwakwas ŋga Mawiz maa sərkada na, ara ŋgada ndəhay masa Gazlavay ma vəldatara kwakwas a. Anda keđe, kwa ndaw ma gwa ŋga wura mey amba a dfiya ray anga na, daa ba, ndəhay cəpa ta mebərey fa mey ŋga Gazlavay. ²⁰ Maja ŋgene, ndaw masa maaya fa mey ŋga Gazlavay maja anga ma səpa kwakwas ŋga Mawiz tabiya na, daa ba. Kwakwas a, a wuzwa na, mebərey ŋga ndəhay gway.

3:13 3.13 Ps 5.10; 140.4 3:14 3.14 Ps 10.7 3:15 3.15-17 Iz 59.7-8
3:18 3.18 Ps 36.2 3:20 3.20 Jəw 4.17; Ps 130.3; 143.2; Rm 4.15;
Gal 2.16; 3.22

Ndohay a da tɔram maaya fa mey nga Gazlavay na, kwara?

²¹ Wure keɗe, Gazlavay ta wuztar cɔvedɗ la a ndohay amba a pata nga ndohay maaya fa mey anɗa. Cɔvedɗ e na, kwa mey nga *kwakwas nga Mawiz da hwaɗɗ a daa ba sɔlak. Ama kwakwas a, lej ndohay ma tɔla mey nga Gazlavay taa guzlam la da ray cɔvedɗ e dɔga zleezle, a lɔvam Gazlavay a wuzwa cɔvedɗ la mawiya. ²² Gazlavay ma pata nga ndohay maaya fa mey anɗa na, maja ata ma pamara Yesu *Kɔriste nga ndaw ata fara fara. Gazlavay a pey nga ndohay maaya fa mey anɗa na, ndohay tabiya masa ma tɔɓmara mey nga Yesu, maja Gazlavay a weley ndohay ta weley ba. ²³ Ndohay tabiya ta kam mebɔrey la. Anda keɗe, ata dɔreɗ ta maaya nga Gazlavay. ²⁴ Ama Gazlavay ta sɔrfatar dey-ceceh la, a tɔrdata nga ndohay maaya fa mey anɗa ta fa Yesu Kɔriste, ndaw masa ma lɔhdata daa mebɔrey. A ka kɔne na, ara nga maaya, ba na, ta cek ba. ²⁵ Ara Yesu a masa Gazlavay ma vɔlda nga mɔcey amba a mbɔkdatara mebɔrey nga ndohay ta fa mambaz anɗa. Ara mambaz a ma mbɔɗwa fa hwadam mazlanɗalākaya ngada ndohay ma pamara nga ndaw ata fara fara. Gazlavay a ka anda keɗe na, amba a wuzdatara a ndohay, anɗa na, ndaw ma ka cek ta cɔvedɗ e. Ahaw, daa masa anɗa ma sɔrdata banay ta ndohay maja mebɔrey ata masa zleezle daa ba heyey na, Gazlavay ta ka cek ta cɔvedɗ e la. ²⁶ Daa nɗene, Gazlavay ta ɓɔsa mebɔrey a la. Gazlavay a ka cek ta cɔvedɗ e wure keɗe may, maja ta fa memɔcey nga Yesu na, a gwa nga key sariya ta cɔvedɗ

3:21 3.21-22 1.2, 17 3:22 3.22 2.11; 3.9; 10.12; 11.32 3:23 3.23 5.2, 12; 8.18-20; MC 3.19 3:24 3.24 5.17; Ef 2.8; Tit 3.7 3:25 3.25 mambaz: Mt 26.28; Ef 2.13; Kwa 1.20; Heb 9.12-14; 1Jn 1.7; CWJ 1.5; 5.9; zazay: 5.1; 2Kwr 5.18-21; Ef 2.14-16; Kwa 1.20; ndaw ma ka cek ta cɔvedɗ e: 1.17; 3.3-4

e. Asaya, a gwa nga pata ndəhay masa ma təbmarə mey nga Yesu nga ndəhay maaya fa mey anga.

²⁷ Da anda keɗe na, aləkwa ta cəvedŋ nga zlepey maja aləkwa ma kadakwa sləra maaya ta kwakwas nga Mawiz daw? Kay! aləkwa ta cəvedŋ daa ba. Aləkwa ta cəvedŋ daa ba na, maja me? Maja cek mahura fa mey nga Gazlavay na, ara mesəpey kwakwas ba, ama ara metəbey-mey nga Yesu. ²⁸ Ahaw, ya sərmara fara fara Gazlavay a nəkə ndaw anga maaya fa mey anga na, maja ndaw a ma təba mey nga Yesu, ba na, maja anga ma səpa kwakwas nga Mawiz tabiya ba. ²⁹ Ka wulkam Gazlavay na, ara Gazlavay nga *Jəwif hay daada daw? Ndəhay masa Jəwif hay ba na, ara Gazlavay ata may, ba diya? Ahaw, fara fara anga na, ara Gazlavay nga ndəhay masa Jəwif hay ba may, ³⁰ maja Gazlavay na, anga pal. Da Jəwif hay a pamara Yesu nga ndaw ata fara fara na, Gazlavay a tərdata nga ndəhay maaya la fa mey anga. Yaw, da ndəhay daa səkway mekele a pamara Yesu nga ndaw ata fara fara na, Gazlavay a tərdata la nga ndəhay maaya fa mey anga may. ³¹ Anda keɗe, da ya pakwa Yesu nga ndaw aləkwa fara fara na, a wudŋey nga ləvey aləkwa fa tərɗakwa kwakwas nga Mawiz nga cek nga tede daw? Kay, kəne ba! Sasəkar aləkwa fa kərzakwa kwakwas a maaya maaya ta har cew cew jak.

4

Gazlavay a tərda Abəraham maaya fa mey anga

¹ Yaw, kaa ya wulkakwa da ray *Abəraham, dede aləkwa zleezle na, kwara? Ta hətəy cek ta gəɗan anga la daw? ² Da Gazlavay ta pa Abəraham nga ndaw maaya

3:27 3.27 3.1, 21, 31; 8.2 3:28 3.28 Gal 2.16 3:29 3.29-30 3.22; 4.11-12
3:31 3.31 6.15; 8.2-4

fa mey anga la ta fa sløra anga masa maaya * na, anja Abøraham a, tøde a zlepey. Ama ta gwa nga zlepey fa mey nga Gazlavay daa ba. ³ Ara anda mawuzlalakaya daa ðerewel nga Gazlavay ma løvey: «Abøraham a tøða mey masa Gazlavay ma løvar. Anda keðe, Gazlavay a nøka na, anga ndaw maaya fa mey anga, maja anga ma pa nga ndaw anga fara fara.»

⁴ Ndaw ma key sløra na, a høtey dala. Dala ha ara mawurðay nga sløra anga, ba na, a vøldamara nga tede ba. ⁵ Ama ndaw ma nøkey dey fa sløra anga ba, a pa Gazlavay nga ndaw anga fara fara na, Gazlavay a pa ndaw a la nga ndaw maaya fa mey anga. Ara Gazlavay ma gwa nga pa ndaw ta mebørey nga ndaw maaya fa mey anga maja Gazlavay a nøka na, ndaw a ma tøða mey anga la. ⁶ Zleezle Bay *Davit taa guzley la letek køne. A løvey ndøhay masa Gazlavay ma pata nga ndøhay maaya fa mey anga kwa ta nøka sløra ata daa ba na, mepøsey-mey nga Gazlavay aa da ray ata.

⁷ Maaya nga Gazlavay aa da ray ndøhay
 masa Gazlavay ma mbøkdatara mebørey ata sem.
 Maaya nga Gazlavay aa da ray ndøhay
 masa Gazlavay ma nøkey dey fa mebørey ata saba.

⁸ Maaya nga Gazlavay aa da ray ndøhay
 masa Gazlavay ma sløfa mebørey ata saba.

⁹ Davit e maa guzley anda keðe na, a wuðey nga løvey maaya nga Gazlavay aha aa da ray ndøhay masa

*
 4:2 4.2 Daa masa Yesu aa da bøla na, Jøwif hay a løvam Abøraham na, ara ndaw maaya fa mey nga Gazlavay maja sløra masa aa ma ka. (Nøka Jak 2.21-23.) Ama Pawl a løvey Abøraham na, ara ndaw maaya fa mey nga Gazlavay maja anga ma pa Gazlavay nga ndaw anga fara fara. (Nøka 4.9lej Gal 3.6-9.) 4:2 4.2 Jak 2.21 4:3 4.3 MC 15.6; Gal 3.6; Jak 2.23 4:6 4.6-8 Ps 32.1-2

maslakaya mandawal daada gway daw? Kay, kəne bal Maaya nga Gazlavay a na, aa da ray ndəhay masa mandawal manjar nga sley may. Ahaw, ya ta ləvkwa la: «Gazlavay a nəka na, Abəraham anga ndaw maaya fa mey anga, maja anga ma pa nga ndaw anga fara fara.»

¹⁰ Masa Gazlavay ma tərda Abəraham a nga ndaw maaya fa mey anga na, daa masa anga ta sla mandawal cay daw, daa ba daw? Fara fara daa ngene na, Abəraham a ta sla mandawal daa ba aran. ¹¹ Daa masa Abəraham ma sla mandawal daa ba aran na, Gazlavay ta nəka cay anga ndaw maaya fa mey anga, maja anga ma pa Gazlavay a nga ndaw anga fara fara. Fa dəba ha, Gazlavay ta', a ləvar nga sla mandawal. *Mesley mandawal a ngene na, fa wuzda anga ndaw maaya fa mey nga Gazlavay. Anda keɗe, Abəraham na, ara papaŋ nga ndəhay masa mandawal manjar nga sley, masa ma təbmarə mey nga Gazlavay.

¹² Asaya, anga papaŋ nga ndəhay masa mandawal maslakaya may. Ya wuɗey ngaa guzley keɗe na, da ray ndəhay maslakaya mandawal cəpa ba, ama yaa guzley na, da ray ndəhay maslakaya mandawal masa ma pamara Gazlavay nga ndaw ata anda papa aləkwa Abəraham ma pa Gazlavay nga ndaw anga fara fara daa masa anga ta sla mandawal daa ba aran.

Gazlavay a da vəltar a ndəhay ma pamara nga ndaw ata fara fara na, me?

¹³ Gazlavay a ləvar ngada *Abəraham ta ngada bəza hay ma da yamawa da hwaɗ anga na, a da vəldatara bəla cəpa ngada ata. Gazlavay a da vəldatara bəla ha na, ara maja Abəraham ma nar ray a *kwakwas nga Mawiz ba, ama maja aa ma pa Gazlavay a nga ndaw anga fara fara. Ara maja ngene, Gazlavay ma pa nga ndaw maaya fa mey

anğa. ¹⁴ Anja da Gazlavay a da vøltar cek a ndøhay maja ata ma søpam kwakwas daada na, ŋgene, mepey Gazlavay ŋga ndaw fara fara, ara cek ŋga tede. Asaya, anja cek masa Gazlavay ma løvey a da vøldatara ha na, ara cek ŋga tede may. ¹⁵ Yaw, da ndøhay a zløbmara kwakwas na, Gazlavay a ceý mevel. Ama da anja kwakwas daa ba na, ndøhay a da zløbam me?

¹⁶ Anda keðe, cek maaya masa Gazlavay ma da vølda na, a da vøldatara ŋgada ndøhay masa ma pamara ŋga ndaw ata fara fara. A da vøldatara na, ŋga maaya maja a wuðey ndaw kalah. Gazlavay ma løvey a da vøltar cek heyey na, ara ŋgada bøza hay ma da yamawa da hwað Abøraham tabiya. A da vølda cek aha na, ŋgada ndøhay ma tøða mey anğa masa ma søpmara kwakwas ŋga Mawiz daada ba, ama ŋgada ndøhay mekele tabiya ma pamara ŋga ndaw ata anda Abøraham zleezle. Abøraham na, ara papa aløkwa, aløkwa tabiya ndav. ¹⁷ Ara anda mawuzlalakaya daa ðerewel ŋga Gazlavay, Gazlavay a løvar a Abøraham: «Ya ta paka la ŋga papan ŋga søkway hay ga.» Yaw, fa mey ŋga Gazlavay na, Abøraham ara papa aløkwa. Anğa ta pa Gazlavay la ŋga ndaw anğa fara fara, Gazlavay ma sløkðadatørwa ndøhay daa memøcey, asaya, ma gwa ŋga kata cek hay masa ma kam daa ba aranj. ¹⁸ Kwa ndøhay siya a wulkam Gazlavay a gwa ŋga vølar cek ŋgada Abøraham anda aa ma løvar heyey daa ba na, Abøraham a fa pa Gazlavay ŋga ndaw anğa fara fara cøŋga. Anda keðe, anğa ta tørey la ŋga «papan ŋga søkway hay ga» anda Gazlavay maa guzlar, a løvar: «Bøza hay da hwað akah a laslam la ga anda wurzla hay.» ¹⁹ Daa masa Gazlavay maa guzlar ŋgene na, Abøraham a

4:13 4.13 MC 12.7; 22.17 4:14 4.14 Gal 3.18 4:15 4.15 3.20; 5.13, 20;
7.7-13; Gal 3.19 4:16 4.16 Gal 3.7 4:17 4.17-18 MC 15.5; 17.4-5; 2Kwr
1.9; Heb 11.12, 19

key mevey temere. Abərahām a səra anğa maraw, gədaŋ anğa daa saba, asaya, a səra ŋgwas anğa Sara na, anğa mađanğwas cay. Ta ŋgene he cəpa, Abərahām fa təba Gazlavay a kar cek la anda aa ma ləvar cəŋga. ²⁰ Fara fara, anğa fa təba mey masa Gazlavay ma ləvar. A wulkey cew cew da ray cek masa Gazlavay ma da vəldara ba. Ama fa hətəy gədaŋ ma fəna ma fəna daa metəbey-mey ŋga Gazlavay, fa həslar ray. ²¹ Yaw, Abərahām a səra Gazlavay aa ta gədaŋ ŋga kara cek anda aa ma ləvar. ²² Ara maja ŋgene, Gazlavay ma pa ŋga ndaw maaya fa mey anğa. ²³ Mey ma ləvey: «Gazlavay a pa ŋga ndaw maaya fa mey anğa» na, mawuzlalakaya daa đerewel ŋga Gazlavay na, ŋgada Abərahām daada ba, ²⁴ ama mey a mawuzlalakaya ŋgada aləkwa may. Da aləkwa fa pakwa Gazlavay ŋga ndaw aləkwa fara fara, Gazlavay ma sləkđadərwa Bay aləkwa Mahura Yesu daa meməcey na, Gazlavay a, a pandakwar ŋga ndəhay maaya fa mey anğa la may. ²⁵ Yesu a na, Gazlavay ta vəlda la a har ndəhay ŋga məcey maja mebərey aləkwa. Fa dəba ha, ta sləkđawa sem daa meməcey amba Gazlavay a pandakwar ŋga ndəhay maaya fa mey anğa.

5

Cek masa ndaw ma da hətəy maja anğa maaya fa mey ŋga Gazlavay na, wura?

¹ Ahaw, Gazlavay a tərdandakwar ŋga ndəhay maaya fa mey anğa na, maja aləkwa ma pakwa ŋga ndaw aləkwa fara fara. Anda keđe, aləkwa manjatakaya daa zazay fa mey anğa maja Bay aləkwa Mahura, Yesu *Kəriste. ² Ara

4:19 4.19-20 MC 17.1-6; Heb 11.11 4:21 4.21 MC 18.14; Lk 1.37 4:22
4.22 4.3 4:23 4.23-24 10.9; 15.4 4:25 4.25 Iz 53.4-5, 10; Rm 8.32-34;
1Kwr 15.17 5:1 5.1 3.21-30; Gazlavay a tərdandakwar ŋga ndəhay
maaya fa mey anğa: 3.25-26

Yesu ma vɔ̄ndakwar cɔ̄vedɔ̄ amba ya sɔ̄rkwa maaya ŋga Gazlavay maja alɔ̄kwa fa pakwa ŋga ndaw alɔ̄kwa fara fara. Alɔ̄kwa majaratakaya daa mey an̄ga ta fa maaya an̄ga ha. Asaya, alɔ̄kwa faa sɔ̄mkwa maja ya sɔ̄rkwa ya hɔ̄tkwa mewedɔ̄y an̄ga la a ray alɔ̄kwa. ³ Ara ŋgene daada ba, ama alɔ̄kwa faa sɔ̄mkwa saya daa masa alɔ̄kwa fa sɔ̄rkwa banay, maja banay a, a jɔ̄ndakwar ŋga bɔ̄sey banay hay mekele mekele. ⁴ Mebɔ̄sey banay na, a vɔ̄ley gɔ̄dan̄ a ndaw ŋga jerey. Yaw, da alɔ̄kwa majaratakaya na, ya sɔ̄rkwa ya da hɔ̄tkwa cek masa Gazlavay ma lɔ̄vey a vɔ̄ldandakwara la heyey. ⁵ Cek aha na, fa da pandakwar hwaray daa ba, maja Gazlavay ta wuzdɔ̄rwa mewudɔ̄y-vaw an̄ga sem ta fa Mesɔ̄fney an̄ga masa aa ma vɔ̄ldandakwara.

⁶ Daa masa alɔ̄kwa ta gɔ̄dan̄ ŋga lɔ̄hda ray alɔ̄kwa daa ba na, Kɔ̄riste ta mɔ̄cey la maja alɔ̄kwa, alɔ̄kwa ndɔ̄hay ma kam hɔ̄ma a ray Gazlavay. A mɔ̄cey a na, ta pas masa Gazlavay ma wala dɔ̄r a. ⁷ Ya sɔ̄rkwa an̄ga ta banay amba ndaw a tɔ̄ba ŋga mɔ̄cey aa slam a ŋga ndaw ma ka cek ta cɔ̄vedɔ̄ e. Ayɔ̄wa, da kwa ndaw a gwa ŋga mɔ̄cey aa slam a ŋga ndaw meekwedɔ̄-mey kwa. ⁸ Ama kwa alɔ̄kwa ta mebɔ̄rey na, ta ŋgene he cɔ̄pa, Kɔ̄riste ta mɔ̄cey la maja alɔ̄kwa cɔ̄n̄ga. Ara anda kedɔ̄e Gazlavay ma wuzda, an̄ga fa wudɔ̄ndakwar kalah. ⁹ Wure kedɔ̄e, Gazlavay ta tɔ̄rdandakwar la ŋga ndɔ̄hay maaya fa mey an̄ga ta fa mambaz ŋga Yesu ma mbɔ̄dɔ̄wa daa memɔ̄cey an̄ga. Anda kedɔ̄e, ya sɔ̄rkwa fara fara Yesu Kɔ̄riste a lɔ̄hdandakwar la,

5:2 5.2 maaya ŋga Gazlavay: 3.21; 6.14; 2Kwr 6.1; 12.9; Gal 1.6; 5.4; Ef 2.5-8; 1Pi 1.10-11; 4.13-14; 5.10, 12; mepey Yesu ndaw alɔ̄kwa fara fara: Rm 3.24; 8.17-18; mewedɔ̄y an̄ga: 8.17-18; 9.23; 1Kwr 2.7; 2Kwr 3.18; 4.17; Kwa 1.27; 3.4; 1Tes 2.12; 2Tm 2.10; 1Pi 5.1

5:3 5.3-5 Jak 1.2-3, 12; 1Pi 1.5-7 5:5 5.5 8.39; Ps 22.6; Heb 6.19 5:6 5.6-7 1Pi 3.18 5:8 5.8 Jan̄ 3.16

Gazlavay fa da cey mevel da ray aləkwa daa saba. ¹⁰ Daa masa aləkwa masa-gəra hay nga Gazlavay na, Gazlavay a ta cəmindakwar ɗay la ta anɗa ray anɗa, ta fa meməcey nga Bəzey anɗa. Wure keɗe, aləkwa macəmkaya ɗay ta anɗa. Anda keɗe, ya sərkwā fara fara a ləhdandakwar la maja Bəzey anɗa ma sləkɗawa sem daa meməcey. ¹¹ Ara keɗe daada ba, ama aləkwa faa səmkwa da ray Gazlavay maja Bay aləkwa Mahura Yesu Kəriste may. Ara maja anɗa, aləkwa macəmkaya ta Gazlavay.

Mey da ray Adam ta Kəriste

¹² Mebərey a sawa a bəla na, ta fa ndaw pal mezəley *Adam. Ndəhay a məcām na, maja mebərey a. Anda keɗe, meməcey fa paslata ndəhay da bəla maja ndəhay tabiya ata ta mebərey. ¹³ Dəga Gazlavay ta wuzdara kwakwas anɗa a *Mawiz daa ba arɗ na, mebərey aa daha da bəla cay. Ama daa masa kwakwas a daa ba arɗ na, Gazlavay fa sləfa mebərey nga ndəhay daa ba may. ¹⁴ Ama ta nɗene he cəpa dəga fa Adam haa kasl fa Mawiz na, ndəhay tabiya ta ləham fa meməcey daa ba cənga. Adam ta cənar mey a Gazlavay daa ba. Kwa ndəhay a ta kam mebərey anda Adam a daa ba na, ta məcām sem cənga. Ya gwakwa nɗa wa Adam a na, ta ndaw ma da sawa.

¹⁵ Ama Adam a na, ata letek ta ndaw ma da sawa ha ba. Mebərey nga Adam anɗa wal ta cek maaya masa Gazlavay ma da vəldatara a ndəhay maja mewuɗey-vaw anɗa. Ahaw, fara fara ndəhay ga ta məcām sem maja mebərey nga ndaw pal. Ama, Gazlavay a katar maaya la ma fəna a ndəhay ga. A da katar maaya ha na, ta fa ndaw pal mezəley Yesu *Kəriste. ¹⁶ Cek masa ndəhay ma hətām

5:9 5.9 1.18; 1Tes 1.10 5:10 5.10 2Kwr 5.18-20; Kwa 1.20-22 5:11 5.11
8.31 5:12 5.12 MC 2.17; 3.19; Rm 6.21, 23; 7.9-10 5:13 5.13 4.15 5:14
5.14 1Kwr 15.21-22, 45-49

ta fa Gazlavay na, a fəna cek masa ndəhay ma hətam ta fa ndaw pal mezəley Adam. Ara anğa ma handərwa mebərey a bəla. Anda keđe, mebərey masa ndaw pal ma ka ha na, sariya nğa Gazlavay ta təđdata ndəhay sem maja. Ama maaya masa Gazlavay ma katara a ndəhay na, a pata ndəhay a nğa ndəhay maaya fa mey anğa. Anda keđe, kwa ndəhay a, ata ta mebərey ga na, sariya nğa Gazlavay fa da təđdata daa ba. ¹⁷ Ahaw, fara fara ndaw pal ta key mebərey la. Anda keđe, meməcey ta kəđta ndəhay tabiya sem maja ndaw aha. Ama ndaw mekele daha wal, ara Yesu Kəriste. Ara ta fa anğa, Gazlavay ma katar maaya a ndəhay ma fəna ma fəna, a ndəvey ba, a cəmtar đay ta anğa ray anğa. Maja ngene, ndəhay a hətam heter mendəvey ba la, asaya, a da wam da ray cek hay bama.

¹⁸ Nəka, ndəhay tabiya na, sariya ta təđdata sem maja mebərey nğa ndaw pal, Adam. Ama ndaw pal daha, ara Yesu Kəriste. Anğa na, ara ndaw ma key cek maaya ta cəved e. Ara ta fa anğa Gazlavay a pata ndəhay nğa ndəhay maaya fa mey anğa. Da ray ngene, ndəhay a hətam heter mendəvey ba la. ¹⁹ Ahaw, ndəhay ga ata ta mebərey maja ndaw pal daha ma cənar mey a Gazlavay ba. Ama ndaw pal daha, ara Yesu Kəriste. Anğa na, ta cənar mey la a Gazlavay. Da ray ngene, ndəhay ga ta təram nğa ndəhay maaya la fa mey nğa Gazlavay maja ndaw aha.

²⁰ Gazlavay ta wuzdatara kwakwas anğa la a ndəhay. Anda keđe, ndəhay fa kam mebərey ma fəna ma fəna. Ama daa masa ndəhay fa kam mebərey ma fəna ma fəna na, Gazlavay fa key dey-ceceh, fa wuzdatara mewudəy-vaw anğa ma fəna ma fəna a ndəhay may. ²¹ Mebərey

a hōtey gōdan da ray ndōhay nḡaa zōḡḡdata na, ta fa memōcey. Ama wure keḡe maaya nḡa Gazlavay aa da ray ndōhay. Gazlavay na, aa ta gōdan nḡa pata ndōhay nḡa ndōhay maaya fa mey aḡḡa. A wuzdōrwa maaya aḡḡa ha amba ya hōtkwa heter mendōvey ba ta fa Bay alōkwa Mahura Yesu Kōriste.

6

*Ndaw nḡa Yesu a key me*bōrey mandaw mandaw daw?

¹ Kaa wure keḡe na, ya da lōvkwa kwara? Maaya na, ya kakwa me**bōrey** mandaw mandaw amba Gazlavay a sōrfandakwar dey-ceceh, a wuḡḡndakwar ma fōna ma fōna daw? ² Kay, kōne ba sōlak! Ta dey nḡa me**bōrey** na, alōkwa anda ndōhay mamōctakaya. Me**bōrey** a gwa a wandakwar saba. Kaa wara ya njakwa mandaw mandaw daa me**bōrey** na, kwara dōḡa wura? ³ Ka sōrmara maaya maaya daa masa alōkwa ma hōtkwa *baptem na, alōkwa macōmkaya ta Yesu *Kōriste. Anda melōvey, alōkwa ma mōckwa la ta aḡḡa may. ⁴ Daa masa alōkwa mamōctakaya ta Kōriste daa yam nḡa baptem na, nḡene anda alōkwa mapōshatakaya ta aḡḡa amba menjey alōkwa a tōrey mawiya. Menjey alōkwa a tōrey mawiya na, letek anda Gazlavay Papanḡ ma slōkḡadōrwa Yesu daa memōcey ta gōdan aḡḡa masa maaya kalah.

⁵ Ahaw, alōkwa ma mōckwa la anda aḡḡa, anda keḡe, alōkwa macōmkaya ta aḡḡa. Da ray nḡene, ya da slōkḡakurwa daa memōcey anda aḡḡa may. ⁶ Ya sōrkwa daa masa Yesu ma mōcey fa hwadam mazlanḡgalakaya na, menjey alōkwa masa zleezle aa fa hwadam a ta pas nḡene may amba menjey alōkwa masa zleezle he a ndōvey. Anda

5:21 5.21 6.23 6:1 6.1 3.5-8, 31; 5.20 6:2 6.2 6.6; 7.4 6:3 6.3-4
Gal 3.27; Kwa 2.12; Tit 3.5; 1Pi 3.21; Mt 28.19 6:4 6.4 2Kwr 5.14-15, 17; Gal
6.15; Kwa 3.1-5, 10 6:5 6.5 FƏl 3.10-11

keɗe, aləkwa beke ŋga mebeɗey saba, ⁷ maja ndaw masa maməɗakaya na, mebeɗey a wa saba. ⁸ Yaw, da aləkwa maməɗakaya ta Kəriste na, ya sərkwā ya da njakwa ta dey bama ta ŋga may. ⁹ Ya sərkwā fara fara Kəriste na, ta sləkɗawa sem daa meməcey. Yaw, ŋga fa da məcey daa saba, meməcey fa da wey da ray a daa ba may. ¹⁰ Kəriste ta məcey la dey pal maja ndəhay tabiya. Ta fa meməcey ŋga ha na, mebeɗey a gwa a wandakwar saba. Wure keɗe na, ŋga ta dey, manjakaya da cakay Gazlavay. ¹¹ Akwar may, akwar kəne. Sərmara, akwar na, maməɗakaya, mebeɗey fa wakwar daa saba. Wure keɗe, akwar ta dey, manjatakaya ta Gazlavay maja akwar macəmkaya ta Yesu Kəriste.

¹² Anda keɗe, ka da vəlmar cəved a mebeɗey ŋga wey da ray vaw akwar ma da məcey ŋgene ba. Cek hay maaya ba masa akwar ma wuɗam kalah na, ka da pamara mewulkey akwar a ray a ba. ¹³ Ka da vəldamara vaw akwar ŋgada mebeɗey amba a tərda vaw akwar ŋga cek ma ka sləra malamba ba. Ama vəldamara ray akwar na, ŋgada Gazlavay anda ndəhay masa maməɗakaya ma sləkɗamawa daa meməcey. Vəldamara ray akwar tabiya a Gazlavay amba a tərdakwar ŋga ndəhay ma ka cek maaya ta cəved e. ¹⁴ Anda keɗe, ara mebeɗey ma da wey da ray akwar saba, maja akwar fa səpmara *kwakwas ŋga Mawiz daa saba, ka səpam na, ŋga hətēy maaya ŋga Gazlavay.

Aləkwa na, ndəhay ma ka cek maaya daw, maaya ba daw?

¹⁵ Kaa ya da kakwa na, kwara? Da aləkwa fa səpkwa *kwakwas ŋga Mawiz daa saba, ya səpkwa maaya ŋga

6:6 6.6 Gal 5.24 6:9 6.9-10 SNM 2.27; Heb 9.25-28; 1Pi 3.18 6:11 6.11
Gal 2.19; 1Pi 2.24 6:12 6.12 12.1 6:14 6.14 5.2; Gal 5.18; 1Jn 3.6

Gazlavay na, aləkwa ta cəved̄ ŋga key mebərey daw? Kay, daa ba! ¹⁶ Ka sərmara da ka vəldamara ray akwar ŋgada ndaw, ka ləvmar ka namar ray la na, akwar ma təram sem ŋga beke aŋga hay, ba diya? Anda keđe, da akwar ma vəlmar cəved̄ sem a mebərey ŋga wey da ray akwar na, ŋgene akwar beke hay ŋga mebərey a, asaya, akwar fa cəhadamawa meməcey a ray akwar. Ama da akwar fa namar ray a Gazlavay na, akwar ta təram sem ŋga beke aŋga hay, anda keđe, a pakwar la ŋga ndəhay maaya fa mey aŋga. ¹⁷ Zleezle na, akwar beke ŋga mebərey, ama wure keđe akwar fa təb̄mara mey ŋga Gazlavay masa ndəhay maa sərkadamakwara ta mevel pal. Ya kakwa suse a Gazlavay maja. ¹⁸ Gazlavay ta pəskakwar sem daa beke ŋga mebərey. Anda keđe, ka da kam cek masa maaya ta cəved̄ e. ¹⁹ Ya wakwara mey a ta beke keđe na, maja aŋga ta banay ŋgada akwar amba ka cəndamara mey a. Zleezle na, akwar anda beke hay. Ka ta vəldamara ray akwar la ŋga key cek hay malamba ma həldakwar ŋga rəsa Gazlavay. Ama wure keđe na, vəldamara ray akwar tabiya ŋgada Gazlavay amba ka kam cek masa maaya ta cəved̄ e anda akwar na, beke aŋga hay. Anda keđe, menjey akwar a mbafar la a Gazlavay.

²⁰ Zleezle daa masa akwar beke ŋga mebərey na, ka wud̄am ŋga key cek masa maaya ta cəved̄ e ba. ²¹ Daa ŋgene na, akwar fa kam cek hay malamba masa fa pakwar hwaray wure keđe. Kaa cek maaya masa akwar ma hətam da hwađ a na, me? Sasəkar cek hay a ŋgene na, fa handawa meməcey a ray akwar jak, ba diya? ²² Wure keđe na, Gazlavay ta pəskakwar sem daa beke ŋga mebərey. Anda keđe, akwar ndəhay ma ka sləra

ɲga Gazlavay. Cek maaya masa akwar ma hɔtam na, ara menjey akwar maaya ma mbafar a Gazlavay. Asaya, menjey akwar a, a da vɔlkwar heter mendɔvey ba ɲga sɔrmataw. ²³ Nɔka, cek mehɔtey fa mebɔrey na, ara memɔcey. Ama cek masa Gazlavay ma vɔlda ɲga maaya na, ara heter mendɔvey ba maja alɔkwa macɔmkaya ta Yesu *Kɔriste, Bay alɔkwa mahura.

7

Kwakwas ɲga Mawiz a da wey da ray alɔkwa saba na, ta vara?

¹ Mɔlma aɗaw hay, ya faa guzlkwar, akwar masa ma sɔrmara *kwakwas ɲga Mawiz. Ka sɔrmara kwakwas a, a wey da ray ndaw na, daa masa ndaw aha ɲga ta dey gway. ² Wakwa mey a ta ɲgwas da way zel. Daa masa zel e aa ta dey ɗagay na, ɲgwas a, aa ta cɔvedɗ ɲga ley zel mekele daa ba, maja kwakwas ɲga Mawiz a vɔlar cɔvedɗ ba. Ama da zel e ta mɔcey sem na, ɲgwas a, aa ta cɔvedɗ ɲga ley zel mekele, kwakwas a, a tɔka saba. ³ Anda kedɗe, da ɲgwas masa zel e aa ta dey, a ley zel mekele na, ɲgene ɲgwas aha ta ley vaw sem da palah. Ama da zel e ta mɔcey sem na, kwakwas a, a vɔlar cɔvedɗ ɲga ley zel mekele. ɲgene, ara meley-vaw saw da palah ba.

⁴ Mɔlma aɗaw hay, ɲgada akwar na, aa letek kɔne may, kwakwas ɲga Mawiz fa wey da ray akwar daa saba. Akwar anda ndɔhay mamɔctakaya maja *Kɔriste ta mɔcey la aa slam a ɲga akwar. Wure kedɗe, akwar na, ɲgada ɲga, ndaw masa Gazlavay ma slɔkɗadɔrwa daa memɔcey. Akwar macɔmkaya ta ɲga amba ka kamar slɔra maaya ma mbafar. ⁵ Zleezle daa menjey alɔkwa na, alɔkwa fa kakwa cek hay saw anda mevel alɔkwa ma wudɗey gway.

Kwakwas nga Mawiz a wuzdandakwara cek hay masa ma kar mebørey a ndaw. Masa aløkwa ma sørtakwa cek hay a la na, sasøkar aløkwa fa katakwa ma føna ma føna jak. Cek hay a fa høldandakwar nga key sløra maaya ba ma handawa memøcey a ray aløkwa. ⁶ Zleezle aløkwa anda beke hay maja kwakwas nga Mawiz, aløkwa anda ndøhay magørcatakaya daa førsøne. Wure keðe, aløkwa mapøskatakaya dasi har nga kwakwas a, amba ya kakwa sløra ngada Gazlavay taa cøved mekele mawiya masa *Mesøfney nga Gazlavay ma wuzdandakwara. Ya kakwa sløra ngada Gazlavay taa cøved magurma masa kwakwas nga Mawiz ma wuzdandakwara saba.

Kwakwas nga Mawiz a wuzwa na, me?

⁷ Kaa wure keðe na, ya da løvkwā kwara? *Kwakwas nga Mawiz na, ara cek maaya ba daw? Kay, køne ba. Anja da kwakwas a daa ba na, ya fa da søra mebørey daha na, daa ba. Kwakwas a, a løvey: «Ka da kam dey fa cek nga ndaw ba.» Anja da kwakwas a ta løvey køne daa ba na, ya søra mekey dey fa cek nga ndaw na, ara mebørey la daw?

⁸ Ama kwakwas a ta wurar cøved sem a mebørey nga key sløra daa yah. Mebørey a ta høldaya la nga key dey fa cek nga ndaw. Anja da kwakwas a daa ba na, mebørey fa da høtey gødaŋ da ray ndaw daa ba. ⁹ Zleezle daa masa ya søra mey da ray kwakwas a ba na, yah ta dey, ya fa wey nga yah. Ama daa masa ya ta cønda mey da ray kwakwas a cay na, mebørey ta høtey gødaŋ sem da ray aðaw. ¹⁰ Da ray ngene, yah na, anda ndaw mamøckaya. Gazlavay ta vøldørwa kwakwas aha la amba ndøhay a høtam heter. Ama ngada yah na, kwakwas a ta cøhaðaya memøcey sem a ray. ¹¹ Ama masa yah ma cønda mey

7:5 7.5 6.21 7:6 7.6 6.7; 8.2-4; 2Kwr 3.6 7:7 7.7 Mew 5.21; MC 2.16-17;
3.6 7:7 7.7-13 4.15 7:8 7.8 1Kwr 15.56 7:9 7.9 5.13 7:10 7.10
Lev 18.5

da ray kwakwas a la na, kwakwas a ta wurar cøved sem a mebørey nga key sløra daa yah. Mebørey a ta høtey cøved sem nga tøkna ya ta fa kwakwas a. Anda keðe, mebørey a ta cøhadaya memøcey sem a ray.

¹² Fara fara, kwakwas nga Mawiz na, anga maaya, mebørey da hwað a daa ba. Asaya, mey hay da ray kwakwas a na, a samawa fa Gazlavay. Ata maaya, mebørey da hwað a daa ba. A jønta ndøhay nga key cek ta cøved e. ¹³ Anda keðe, cek masa maaya na, a gwa nga handawa memøcey a ray aðaw daw? Kay, køne ba! Ma handørwa memøcey a ray ndaw na, ara mebørey. Mebørey a ta høtey cøved sem ta fa cek masa maaya nga handaya memøcey a ray. A key anda keðe na, amba ndøhay a sørmara mebørey ara cek maaya ba kalah ta fa kwakwas a.

Cek maaya ta maaya ba a cømam daa ndaw na, kwara?

¹⁴ Ya sørkwa *kwakwas nga Mawiz na, a sawa ta fa Gazlavay, ama aløkwa na, ndøhay magødan gway. Ya ta tørkwa beke nga mebørey sem. ¹⁵ Fara fara, cek masa yah ma ka na, ya ka maja me na, ya søra ba, maja cek maaya masa yah ma wuðey na, ya ka ba. Ama ya key na, cek masa yah ma wuðey ba jak. ¹⁶ Da ya key cek masa yah ma wuðey ba na, ngene, ya tøba, ya søra kwakwas a na, anga maaya. ¹⁷ Anda keðe, da ya key cek maaya ba na, ara yah ma ka ba. Ara mebørey masa daa yah ma ka cek aha. ¹⁸ Ahaw, ya søra yah ta gødan nga key cek maaya ta cøved e na, daa ba. Anda meløvey yah na, ndaw-magødan. Ya wuðey nga key cek maaya ta cøved e, ama gødan aðaw daa ba. ¹⁹ Yaw, cek maaya masa yah ma wuðey nga ka na, ya fa ka daa ba, ama ya key na, cek maaya ba masa yah ma

wuḏey nga ka ba jak. ²⁰ Da ya key cek maaya ba masa yah ma wuḏey nga ka ba na, a wuḏey nga ləvey ara yah ma ka ba. Ara mebərey masa daa yah ma ka cek aha.

²¹ Ya wuḏey nga key cek maaya, ama ya da key na, cek masa maaya ba gway. Keḏe ara cek masa yah ma sangala daa menjey aḏaw. ²² Daa mevel aḏaw na, ya fa wuḏey fara fara nga səpa *kwakwas nga Gazlavay. ²³ Ama ya nəka na, cek maaya ba ma fənya ray daha. Cek aha fa təka mewulkey aḏaw nga key cek masa maaya. Cek maaya ba ha ma fənya ray a na, ta tərdaya sem nga beke nga mebərey. ²⁴ Ay! Yah na, ndaw ta matəway daa dey. Yah na, meməcey aa da ray aḏaw. Ma da ləhdaya daa meməcey a na, wa? ²⁵ Ara Gazlavay ma da ləhdaya ta fa Bay aləkwa Mahura Yesu *Kəriste. Ara maja ngene, ya fa kar suse ta mevel aḏaw cəpa.

Anda keḏe, daa mewulkey aḏaw na, ya wuḏey nga səpa kwakwas nga Gazlavay. Ama maja yah ndaw-magədaŋ na, ya key na, cek masa ma handaya mebərey a ray jak.

8

Mesəfney nga Gazlavay a jənta ndəhay daa menjey ata na, kwara?

¹ Wure keḏe ndəhay masa macəmkaya ta Yesu *Kəriste na, sariya nga Gazlavay fa da təḏdata daa ba.

² Mebərey fa da hətey gədaŋ nga handawa meməcey a ray aləkwa daa saba, maja gədaŋ nga *Mesəfney nga Gazlavay aa da ray aləkwa. Gədaŋ nga Mesəfney nga Gazlavay a, a vəlndakwar heter mawiya ta fa Yesu Kəriste.

³ *Kwakwas nga Mawiz na, a gwa nga key sləra anda Gazlavay ba, maja bəle nga ndaw-magədaŋ ta tərda

kwakwas a sem nga cek manjar gødan. Gazlavay aa ta gødan ma føna kwakwas nga Mawiz. Gazlavay a wuzda anga na, a wufey nga cøney mebørey fa slømay anga ba sølak, a kar sariya a ndaw-magødan maja mebørey anga. Anda keðe, ta slørdørwa Bøzey anga la a bøla, a tørey nga ndaw-magødan, vaw anga anda aløkwa ndøhay ma ka mebørey. Gazlavay a ka anda keðe, nga løhdata ndøhay daa mebørey ta fa memøcey nga Bøzey anga ha. Anda keðe, ta føna gødan nga mebørey sem ta fa Bøzey anga ha. ⁴ Gazlavay a ka anda keðe na, amba ya tøkwa ndøhay ma ka cek ta cøved e fara fara anda kwakwas a ma wufey ya kakwa. Ya kakwa na, anda mewufey nga ndaw-magødan saba, ama ya kakwa anda Mesøfney nga Gazlavay ma wufey.

⁵ Ndøhay ma søpam nga njeý anda ndøhay magødan ma wuðam na, a wulkam mandaw mandaw da ray cek masa ma mbafatar gway. Ama ndøhay ma kam cek anda Mesøfney nga Gazlavay ma wufey na, a wulkam mandaw mandaw da ray cek masa ma mbafar a Mesøfney a. ⁶ Da ndaw a wulkey mandaw mandaw da ray cek masa ma mbafar gway na, a key ngene, a cøhaðawa memøcey a ray anga. Ama da ndaw a wulkey mandaw mandaw a ray cek ma mbafar a Mesøfney nga Gazlavay na, ngene, Gazlavay a da vølar heter mawiya, asaya, a da njada daa zazay.

⁷ Ndøhay ma wulkam mandaw mandaw da ray cek masa ma mbafatar a vaw ata hay na, ata masa-gøra hay nga Gazlavay. Ata fa søpmara kwakwas nga Gazlavay daa ba, kwa a gwamara nga key sløra ta kwakwas a ba. ⁸ Ndøhay ma søpam nga key cek masa ma mbafatar a vaw ata hay gway na, ndøhay a, fa da mbafamar a Gazlavay daa ba.

⁹ Ama akwar na, akwar fa kam cek ma mbafar a vaw

8:3 8.3 Gal 4.4; Føl 2.7-8; 2Kwr 5.21 8:4 8.4 6.22; 7.4; 13.10; Gal 5.16, 25 8:6 8.6 6.21; Gal 6.8

akwar hay daa ba. Ka sɔpam na, cek masa ma mbafar a Mesɔfney nga Gazlavay maja Mesɔfney a, aa da ray akwar. Ndaw masa Mesɔfney nga Kɔriste da ray a daa ba na, ndaw aha ara ndaw nga Kɔriste ba. ¹⁰ Da Kɔriste aa daa mevel akwar na, Mesɔfney nga Gazlavay a vɛlkwar heter mawiya la maja aa ma pakwar nga ndɔhay maaya fa mey aɲga. Kwa ka mɛcam la, vaw akwar a zey la maja mebɔrey na, ka hɛtam heter mawiya la. ¹¹ Asaya, da Mesɔfney nga Gazlavay ma slɛkɔɔadɔrwa Yesu Kɔriste daa memɔcey aa da ray akwar na, ɲgene Gazlavay a da slɛkɔɔadakurwa daa memɔcey may. Anda keɔɔe, a da slɛkɔɔadakurwa ha na, ta gɔɔaɲ nga Mesɔfney aɲga masa da ray akwar a.

¹² Mɛlma aɔaw hay, ara maja ɲgene si ya njakwa anda Mesɔfney nga Gazlavay ma wuɔɔey, ba na, anda vaw alɛkwa ma wuɔɔey ba. ¹³ Yaw, da akwar fa kam cek masa ma mbafar a vaw akwar gway na, ka mɛcam la. Ama da akwar fa vɛlmar cɔvedɔ a Mesɔfney nga Gazlavay nga jɔnkwar nga mbɛkda mekey cek hay maaya ba na, ɲgene, ka hɛtam heter mawiya la. ¹⁴ Ndɔhay cɔpa masa ma vɛlmar cɔvedɔ a Mesɔfney nga Gazlavay nga wey da ray ata na, ndɔhay a ɲgene, ara bɔza hay nga Gazlavay.

¹⁵ Mesɔfney masa akwar ma tɔbɔmara nga wey da ray akwar a na, fa da tɔrdakwar nga beke hay daa ba, akwar fa da njam ta mandɔrzay daa dey daa saba. Ama Mesɔfney nga Gazlavay a, a da tɔrdakwar nga bɔza hay nga Gazlavay, a da jɔnndakwar nga zɔla Gazlavay a: «Aba», anda melɔvey, «Papay.» ¹⁶ Mesɔfney a, fa wuzdandakwara daa mevel alɛkwa na, alɛkwa bɔza hay nga Gazlavay fara fara. ¹⁷ Ahaw, alɛkwa na, bɔza hay nga Gazlavay. Anda keɔɔe, ya hɛtkwa cek masa aɲga ma bɔda maja alɛkwa la. Ya

8:9 8.9 1Kwr 3.16 8:10 8.10 Gal 2.20; 1Jɲ 3.24 8:11 8.11 2Kwr 4.14
 8:12 8.12 6.18 8:13 8.13 Gal 6.8; Ef 4.22-24 8:14 8.14 1Jɲ 2.29-3.1
 8:15 8.15 Mk 14.36; Gal 4.5-7

da hōtkwa cek aha na, bama daa slam a ta Kōriste maja da alōkwa ma sōrkwa banay la bama ta Kōriste na, ya da njakwa bama ta anġa daa slam anġa mewedeŋey may.

Mey da ray mewedeŋey nġa Kōriste

¹⁸ Ya sōra, banay masa alōkwa ma sōrkwa wure keŋe kaa na, ara cek mecōhe nġa tede. Fara fara, slam-mewedeŋey nġa Gazlavay masa aa ma vōldandakwara na, anġa maaya, a wam ta banay masa alōkwa ma sōrkwa wure keŋe ba.

¹⁹ Cek hay tabiya masa Gazlavay ma katōrwa na, cek hay a fa sōkwmarā ŋar masa Gazlavay ma da wuzdatōrwa bōz anġa hay daa slam anġa mewedeŋey amba ŋar a, a wuswa fiyaw fiyaw. ²⁰ A sōkwmarā maja cek hay tabiya masa Gazlavay ma katōrwa na, ta tōram sem nġa cek nġa tede. Ara cek hay a ma wuŋam nġa key kōne ba, ama ara Gazlavay ma la har anġa da ray ata. Ta nġene he cōpa, fa sōkwmarā Gazlavay nġa ka slōra anġa da ray ata cōnġa. ²¹ Slōra ha na, ara Gazlavay ma da pōskatōrwa dasi har nġa ndaw ma nōsta, ma tōrdata nġa beke. Anda keŋe, cek hay a tabiya a da hōtam mewedeŋey nġa Gazlavay bama daa slam a ta bōza hay nġa Gazlavay. A da wam nġa ata anda bōza hay nġa Gazlavay.

²² Ya sōrkwa dōga mezley nġa bōla haa wure keŋe, cek hay tabiya masa Gazlavay ma katōrwa na, fa sōram banay, a njaram anda nġwas ma da yey. ²³ Ma sōram banay a daa masa ata fa sōkwmarā na, ara cek hay a daada ba, ama alōkwa may fa njarakwa daa mevel alōkwa. Alōkwa na, ndōhay masa Gazlavay ma vōldandakwar Mesōfney anġa teesēŋ da ray cek hay mekele masa anġa ma da vōldandakwara. Anda keŋe, alōkwa fa sōkwakwa pas masa Gazlavay ma da tōrdandakwar nġa bōz anġa

hay fara fara, a da p̄eskandakwar dasi har ɲga ndaw ma n̄sndakwar, amba kwa waawa a wey ray aɲga.

²⁴ Gazlavay ta l̄hdandakwar sem daa meb̄orey ama ya s̄ortakwa cek hay masa Gazlavay ma da ka da ray al̄okwa tabiya ba araɲ. Al̄okwa fa s̄arkwa fara fara ya h̄otkwa cek hay a la. Da ndaw ta h̄otar cek masa aa ma s̄okwa sem ta dey aɲga na, a s̄okwa cek aha saba maja cek aha aa fa dey aɲga cay. Ma da s̄okwa cek masa aɲga ma h̄otar sem ɲgene na, wa d̄ɔba wa? ²⁵ Al̄okwa na, fa s̄okwakwa cek masa al̄okwa ma h̄otkwa ta dey al̄okwa daa ba araɲ. Anda keɗe, ya b̄eskwa mevel ɲga s̄okwa cek aha ta zazay.

²⁶ *Mes̄ɔfney ɲga Gazlavay fa j̄onndakwar may, maja al̄okwa ḡɔɗaɲ p̄oreh daa c̄oveɗ ɲga Gazlavay. Kwa ya s̄arkwa cek masa al̄okwa ma daa c̄ɔɗakwa fa Gazlavay ba. Ama Mes̄ɔfney ɲga Gazlavay a, ta ray aɲga, fa d̄ɔrar daɲgay a Gazlavay aa slam a ɲga al̄okwa. Aa c̄ɔɗa Gazlavay ta mevel pal, aa guzlar a Gazlavay ta mey masa ma f̄ɔnar ray a ndaw-maḡɔɗaɲ ɲga guzley. ²⁷ Gazlavay ma s̄ɔra cek daa mevel ɲga ndaw na, a c̄ɔnda cek masa Mes̄ɔfney aɲga ma wuɗey, maja Mes̄ɔfney a faa c̄ɔɗa Gazlavay amba a j̄ɔnta nd̄ohay aɲga hay anda Gazlavay ma wuɗey.

²⁸ ɲgada nd̄ohay ma wuɗmara Gazlavay, nd̄ohay masa Gazlavay ma z̄elta ɲga key cek anda aɲga ma wuɗey na, ya s̄arkwa cek hay tabiya masa ata ma h̄ɔtam na, ara Gazlavay ma ka amba a t̄ɔrey ɲga cek maaya ɲgada ata.

²⁹ D̄ɔga zleezle na, Gazlavay ta walata nd̄ohay aɲga hay cay. Asaya, ara aɲga ma wuɗey ɲga t̄ɔrdata nd̄ohay aɲga hay a anda B̄ɔzey aɲga. A ka anda keɗe na, amba B̄ɔzey aɲga a t̄ɔrey b̄ɔzey maa-mey-ndaw da wuzlah nd̄ohay

ɲga Gazlavay masa anda mɔlmanɲ hay ga. ³⁰ Yaw, ndɔhay masa Gazlavay ma walata ɲgene na, Gazlavay ta zɔltɔrwa la ɲga key ndɔhay anɲa hay may. Daa masa aa ma zɔlta ha na, ta pata la ɲga ndɔhay maaya fa meɲ anɲa may. Asaya, ndɔhay masa aa ma pata ɲga ndɔhay maaya fa anɲa na, ta handata sem aa slam anɲa mewedɛy may.

Gazlavay a wuɔndakwar mandaw mandaw

³¹ Kaa wure keɔɔe na, meɲ mambɔkakarta ɲga lɔvey daha saya daw? Gazlavay aa ta alɔkwa, kaa ma da gwa a ray alɔkwa na, wa? ³² Gazlavay ta ɔadɔrwa Bɔzey anɲa daa ba, ama ta slɔrdɔrwa la a bɔla ɲga mɔceɲ maja alɔkwa tabiya. Anda Gazlavay ma slɔrdandakwara Bɔzey anɲa na, fara fara a vɔldandakwara cek hay tabiya la may. ³³ Ma gwa ɲga mbɔɔtar ray ɲgada ndɔhay masa Gazlavay ma walata na, wa? Kwa ndaw pal ma gwa daa ba, maja ara Gazlavay ma tɔrdata ɲga ndɔhay masa maaya fa meɲ anɲa. ³⁴ Ndɔhay masa Gazlavay ma walata na, ma gwa ɲga tɔɔdata ta sariya na, wa? Kwa ndaw pal ma gwa daa ba, maja Yesu *Kɔriste ta mɔceɲ la, ta slɔkɔfawa sem daa memɔceɲ, wure keɔɔe aa manjakaya ta har-zɔmay ɲga Gazlavay, fa dɔrey dangay maja alɔkwa. ³⁵ Ma da wunkandakwar ta Kɔriste amba a wuɔndakwar saba na, me? Kwa alɔkwa daa banay, kwa mewulkey fa hɔɔndakwar ray, kwa ndaw a cakalafandakwar meɲ, kwa alɔkwa daa may, kwa alɔkwa daa viya, kwa anja ndaw a wuɔfey ɲga kandakwar cek maaya ba, kwa ndaw a kɔɔndakwar vagay na, cek hay a cɔpa ɲgene, a gwa ɲga wunkandakwar ta Kɔriste ba. ³⁶ Anda mawuzlalakaya daa ɔerewel ɲga Gazlavay, ma lɔvey:

8:29 8.29 Kwa 1.18; Heb 1.6 8:30 8.30 1.7; 5.2; 2Tes 2.13-14 8:31 8.31
 Ps 118.6 8:31 8.31-34 Iz 50.8-9 8:32 8.32 5.8; Janj 3.16 8:34 8.34
 4.25; SNM 2.33; Heb 7.25; 1Jɲ 2.1 8:35 8.35 2Kwr 5.14

«Bay Gazlavay, ndøhay fa søpmandar mandaw mandaw
 nga kødfey vagay maja ala ndøhay akah hay.

Fa mey nga ndøhay na,

ala * anda tøbar hay masa ma handamata nga
 hørey.»

³⁷ Ta ñgene he cøpa, ya kakwa bay-gula la da ray banay
 hay a ñgene tabiya ta gødan nga ndaw ma wuñdakwar
 kalah. ³⁸ Ahaw, ya søra fara fara cek ma gwa ma
 wunkandakwar ta ndaw masa ma wuñdakwar kalah ha
 na, daa ba. Kwa ya møkwa, kwa aløkwa ta dey, kwa
 maslan hay nga Gazlavay, kwa gødan nga bay hay masa da
 bøla kefe ta gødan nga mesøfney hay masa daa memedf,
 kwa cek hay ma kam wure kefe ta cek hay ma da kam
 ñgada fa mey, ³⁹ kwa maazla hay da gazlavay da vadf,
 kwa daa vøgedf nga awaw magaza, kwa cek wura wura
 mekele masa Gazlavay ma katørwa, kwa meeme cøpa a
 gwa nga wunkandakwar ta mewuðfey-vaw nga Gazlavay
 ba. Ara mewuðfey-vaw masa anga ma wuzdørwa ta fa
 Yesu Køriste, Bay aløkwa Mahura.

9

Mey da ray Israyel hay, ndøhay masa Gazlavay ma walata

¹ Mey masa yah ma daa guzlda kefe na, ara mey fara
 fara, ya mbørzley ba, maja yah na, ndaw nga *Køriste.
 Asaya, *Mesøfney nga Gazlavay fa wa mewulkey adaw,
 mewulkey adaw a fa wuzda, mey masa yah ma kada kefe
 na, ara mey fara fara. ² Ya wuðfey nga løvey na, mewulkey
 fa da køðya, mevel fa caya mandaw mandaw ³ da ray

* 8:36 8.36 ala: Daa Ps 44.23aa guzley da ray søkway nga Jøwif hay,
 ama fedfe na, Pawl aa guzley da ray ndøhay nga Yesu.

8:36 8.36 Ps 44.23; 2Kwr 4.11 8:37 8.37 1Jñ 5.4-5 8:38 8.38 Ef 1.21;
 1Kwr 3.22; 15.24; 1Pi 3.22 8:39 8.39 5.5; Jan 3.16; 2Kwr 13.13; Ef 1.4; 2.4;
 1Tes 1.4; 2Tes 2.16 9:2 9.2-3 Mab 32.32

səkway aɗaw hay *Jəwif hay. Ala na, ŋga way ala pal. Da Gazlavay a sərə na, ŋga nəsyə, ŋga wunkandar ta Kəriste amba məlma aɗaw hay Jəwif a ɗiyam. ⁴ Ata daa səkway ŋga *Israyel hay. Gazlavay ta walata sem ŋga təram bəz anɗa hay, ta wuzdatara gədaŋ anɗa la, ta jəwam mey la ta ata, ta wuzdatara kwakwas anɗa la, ta wuztar cəved la amba a dərmar daŋgay, ta wuzdatara cek maaya masa aa ma ləvey a da vəldatara heyey la. ⁵ Ata na, ndəhay daa səkway ŋga papaŋ ŋga papa aləkwa hay zleezle *. Yesu Kəriste may, daa masa anɗa ndaw-magədaŋ na, anɗa ndaw daa səkway a. Ama ta ŋgene he cəpa na, ta təbmara mey anɗa daa ba. Kəriste he na, ara ndaw ma wata cek hay tabiya. Anja ndəhay ŋga həlmamara Gazlavay ŋga sərmataw. Amen.

⁶ Ya wudəy ŋga ləvey mey masa Gazlavay maa guzlda na, ta key anda aa ma ləvey daa ba na, kəne ba. Mey a ta key la. Ama ya wudəy ŋga ləvey, Israyel hay na, ara ndəhay ŋga Gazlavay cəpa ba. ⁷ *Abəraham ta yey bəza hay la. Ama bəza hay a cəpa na, ara bəz anɗa hay fara fara anda Gazlavay ma ləvey ba, maja Gazlavay taa guzlar la zleezle a Abəraham a, a ləvar: «Ara ta fa bəza hay ŋga bəz akah *Izak, sləmay akah ma da zəley.» ⁸ Anda meləvey, bəza hay masa Abəraham ma yatərwa na, ata tabiya bəza hay ŋga Gazlavay ba. Ama bəza hay ŋga Gazlavay fara fara na, ara bəza hay masa Abəraham ma yatərwa maja

9:4 9.4 səkway ŋga Israyel hay: Mab 4.22; Aw 11.1; gədaŋ ŋga Gazlavay: Mab 16.10; 24.16-17; 40.34-35; mejəwey-mey: MC 17.7; Mab 24.7-8; kwakwas anɗa: Mab 20-24; Gazlavay a da ka cek anda anɗa ma ləvey: 3.2, 4; 4.13, 17; Gal 3.6, 14 * 9:5 9.5 papaŋ ŋga papa aləkwa hay: Anda meləvey, Abəraham, Izak, leŋ Jakwap ta bəz anɗa hay kuraw a ray a cew. 9:5 9.5 15.8; Mab 3.6, 15; Kəriste: Mt 1.1; Rm 1.3-4 9:6 9.6 3.3-4; 2.28-29 9:7 9.7 MC 21.12; Mt 3.9

Gazlavay ma ləvar a da vəlar bəza hay ga heyey. ⁹ Mey masa Gazlavay ma ləvar a Abərahama a zleezle a da vəlar cek heyey na, mey a, a ləvey: «Haa kasl səfed anda keđe na, ya vəhwa la. Daa ŋgene, Sara ta yawa bəzey mezəle cay.»

¹⁰ Yaw, ara ŋgene daada ba. Rebeka may, ta yawa la, a yawa bəza hay cew. Ata ŋga papa ata pal. Papa ata ha na, ara dede aləkwa Izak zleezle. ¹¹⁻¹² Gazlavay a ləvar a Rebeka: «Bəzey mahura na, a da kar sləra ŋgada mecəhe.» Gazlavay maa guzlar anda keđe na, daa masa bəza hay a, a sərmara ma key cek masa maaya ta maaya ba, ba araŋ, ara daa masa ata da hwaď mama ata đagay. Gazlavay ma ləvey anda keđe na, ŋga wuzda aŋga na, fa key cek mandaw mandaw anda aa ma wuďey. A weley ndaw masa aa ma wuďey. A walata na, maja sləra masa ndaw a ma ka ba. ¹³ Anda mawuzlalakaya daa đerewel ŋga Gazlavay ma ləvey:

«Ya weley na, Jakwap. Ezayu na, ya wuďa ba.»

¹⁴ Da kəne na, ya da ləvkwa kwara dəba wura? Gazlavay a na, ara ndaw ma key cek ta cəved e ba dəba daw? Kay, kəne ba! ¹⁵ Gazlavay ta ləvar la a *Mawiz zleezle: «Da ya wuďey ŋga key maaya a ndaw na, ya ka. Asaya, da ya wuďey ŋga sərey dey-ceceh fa ndaw na, ya sərfar.» ¹⁶ Anda keđe, da Gazlavay a kar maaya a ndaw na, ara maja ndaw a ma wuďey ba, asaya, maja sləra ŋga ndaw a ma ka ba, ama ara maja Gazlavay ma sərfar dey-ceceh. ¹⁷ Daa đerewel ŋga Gazlavay na, Gazlavay a ləvar a *Farawaŋ, bay ŋga *Ejip: «Yah ma paka aa bay na, amba ya wuzdərwa gədaŋ aďaw ta fa kah, asaya, amba ndəhay da bəla cəpa a zəldamaya sləmay.» ¹⁸ Anda keđe, Gazlavay

9:8 9.8 Gal 3.7; 4.23 9:9 9.9 MC 18.10, 14 9:10 9.10-12 MC 25.21-23;
Rm 11.6 9:13 9.13 Mal 1.2-3 9:14 9.14 3.5; Mew 32.4 9:15 9.15
Mab 33.19; Mt 20.1-15 9:16 9.16 Ef 2.8 9:17 9.17 Mab 9.16

a gwa nga sərfar dey-ceceh a ndaw masa aa ma wuḏey, asaya, a gwa nga tərda ndaw nga macarakaya anda aa ma wuḏey.

Gazlavay a gwa nga key cek anda aa ma wuḏey

¹⁹ Da kwa ndaw a da ləvyā: «Da anda keḏe na, Gazlavay a mbəḏtar ray a ndəhay na, fa me dəḅa me? Ndəhay a gwamara nga təkmarā cek masa aa ma wuḏey nga ka daw?» ²⁰ Kah ndaw-magəḏaŋ nga tede, kah na, wa may wa, amba ka kada yawa ta Gazlavay na! Maŋgayak maləmkaya na, a gwa nga ləvar a ndaw ma ləma: «Ka ləmya anda keḏe na, maja me daw?» Kay, a gwa ba!

²¹ Ndaw ma ləma maŋgayak a gwa nga key cek ta hahay nga meləmey anda aa ma wuḏey. A gwa nga wunka hahay a cew, pal a ləmda maŋgayak wal membey kalah, langar may, a ləmda maŋgayak masa saw kəne.

²² Yaw, da Gazlavay a ka anda ndaw ma ləma maŋgayak na, mey akah da hwaḏ a me? Gazlavay a wuḏey nga wuzdərwa na, aŋga fa cey mevel da ray ndəhay, asaya, a wuḏey nga wuzdərwa gəḏaŋ aŋga a ndəhay. Ama ndəhay masa anja aŋga ma da cey mevel da ray ata ta masa aŋga ma da katar sariya ŋgaa zəḏdata na, fa ḅəsta kwa ara mey ba cəŋga. ²³ Gazlavay fa ḅəsta na, amba a wuzdatara gəḏaŋ aŋga a ndəhay. A wuḏey nga pa gəḏaŋ aŋga ha a ray ndəhay masa aŋga ma sərɤatar dey-ceceh. Ta ḏiyta la dəga zleezle amba a hətam gəḏaŋ aŋga ha.

²⁴ Ndəhay a na, ara aləkwa. Gazlavay a zəlndakwar na, da wuzlah ndəhay *Jəwif hay daada ba, ama da wuzlah ndəhay daa səkway mekele hay may. ²⁵ Ara anda

9:18 9.18 Mab 4.21; 7.3; 9.12; 14.4; 1Pi 2.8 9:20 9.20 Iz 29.16; 45.9 9:21
9.21 Jer 18.6; 2Tm 2.20 9:22 9.22 2.4, 8 9:23 9.23 5.2 9:24 9.24 1.16;
10.12

Gazlavay maa guzley ta mey Awze, *ndaw ma tōla mey an̄ga, ma lōvey:

«Ndōhay masa ata ndōhay aḏaw hay zleezle ba na,
ya da zōlta ndōhay aḏaw hay.

Ndōhay masa ya wuḏta ba zleezle na,
ya da zōlta ndōhay aḏaw hay mawuḏtakaya kalah.

²⁶ Daa slam masa yah ma lōvtar la a ndōhay:

“Akwar ndōhay aḏaw hay ba” na,

yah, Gazlavay masa ta dey,

ya da zōlta “bōz aḏaw hay”.»

²⁷ *Izay, ndaw ma tōla mey ŋga Gazlavay may, taa guzley la da ray *Israyel hay, a lōvey: «Anja kwa Israyel hay ata ga a slōfam ba anda mawurḏay da wayam na, Gazlavay a da lōhey daa mebōrey na, ndōhay nekōḏey da wuzlah ata gway. ²⁸ Fara fara Bay Gazlavay a da ka slōra an̄ga cōpa fiyaw fiyaw da bōla anda aa ma lōvey.» ²⁹ Yaw, anda Izay

a maa guzley dōga zleezle saya, a lōvey:

«Da Bay Gazlavay ma wa slam da vaḏ tabiya

ta mbōkndakwar ndōhay nekōḏey

daa sōkway alōkwa daa ba na,

anja ŋgene, ya ta paslakwa sem sle’

anda ndōhay daa berney ŋga Sadawm ta ŋga Gwamar.»

Mey da ray mepey Yesu ŋga ndaw fara fara

³⁰ Kaa wure keḏe, ya da lōvkwa na, kwara? Ya lōvkwa ndōhay *Jōwif hay ba na, fa sōpam cōveḏ amba Gazlavay a pata ŋga ndōhay maaya fa mey an̄ga na, daa ba. Ama Gazlavay a pata ŋga ndōhay maaya fa mey an̄ga na, maja ata ma pamara *Kōriste ŋga ndaw ata fara fara.

³¹ *Israyel hay na, fa sōpam *kwakwas ŋga Mawiz amba

9:25 9.25 Aw 2.25; 1Pi 2.10 9:26 9.26 Aw 1.10 9:27 9.27-28 Iz 10.22-23

9:29 9.29 Iz 1.9 9:30 9.30 10.20

Gazlavay a pata nga ndəhay maaya fa mey anğa. Ama ta hətam amba a pata nga ndəhay maaya fa mey anğa ha anda kwakwas a ma wuɖey na, daa ba. ³² Ta hətam daa ba maja me? Maja a wulkam Gazlavay a da pata nga ndəhay maaya fa mey anğa na, ta fa cek masa ata ma kamara gway. Fa pamara Gazlavay nga ndaw ata fara fara na, daa ba. Anda keɖe, salay ata ta keɖey sem fa anğwa mekey mecembey a ndəhay, ³³ anda mawuzlalakaya daa ɖerewel nga Gazlavay ma ləvey:

«Nəka, daa berney nga Siyanɔw na,
ya da pey anğwa mekey mecembey a ndəhay,
ara anğwa ma tɔɖdata ndəhay.

Ama kwa waawa ma zlembey ta anğwa † ha na,
a zəley marava daa ba səlak.»

10

Mey da ray Jəwif hay ma da ləham

¹ Məlma aɖaw hay, cek masa yah ma wuɖey ta mevel aɖaw cəpa na, anja Gazlavay nga ləhdata səkway aɖaw hay *Jəwif hay daa mebərey. Ya fa dərey dangay mandaw mandaw maja ata. ² Ya gwa ya ləvey ata na, ta vəldamara ray ata la ta mevel ata cəpa nga səpey cəvedɛ nga Gazlavay. Kwa ta səpmara cəvedɛ e la ta mevel ata cəpa na, ama ta səmra cəvedɛ masa fara fara na, daa ba. ³ Ata ta səmra nga səpey cəvedɛ masa amba Gazlavay a pata nga ndəhay maaya fa mey anğa na, daa ba. A səpam amba Gazlavay a pata nga ndəhay maaya fa mey anğa na, ta fa cek hay masa ata ma kamara ta har ata gway. Anda keɖe,

9:31 9.31 10.2-3 9:32 9.32 4.4-5 † 9:33 9.33 anğwa: A wuɖey nga ləvey Yesu. Kwa waawa ma zlembey ta anğwa ha na, anda meləvey, kwa waawa ma təba mey nga Yesu a. 9:33 9.33
Iz 8.14; 28.16; 1Pi 2.6-8 10:1 10.1 9.1-3 10:2 10.2 SNM 22.3

cøved̥ fara fara masa Gazlavay ma da pata nga ndøhay maaya fa mey anga na, a wuɗam ba. ⁴ Fara fara, døga *Køriste ma sawa a bøla na, gødan̄ nga *kwakwas nga Mawiz ta ndøvey sem. A key anda keɗe, amba Gazlavay a pey nga ndøhay maaya fa mey anga na, ndøhay ma pamara nga ndaw ata fara fara.

Mey da ray ndøhay daa søkway wura wura ma da løham

⁵ Masa *Mawiz maa guzley zleezle da ray ndaw ma wuɗey amba Gazlavay a pa nga ndaw maaya fa mey anga maja aa ma søpa kwakwas anga na, a løvey: «Ndaw ma søpa kwakwas a mandaw mandaw, ma røsa ba sølak na, a høtey heter la ta fa kwakwas a.» ⁶ Ama cøved̥ amba Gazlavay a pa ndaw nga ndaw maaya fa mey anga maja aa ma pa nga ndaw anga fara fara na, cøved̥ e anga wal. Mawuzlalakaya daa ɗerewel nga Gazlavay da ray cøved̥ e, a løvey: «Kah ndaw-magødan̄, ka da wulkey daa mevel akah, ka løvey ma da tøpey a gazlavay a vad̥ na, wa?» na, ka da løvey køne ba. Anda meløvey, ka da løvey «Ma da tøpey a gazlavay a vad̥ nga bøn̄gadørwa *Køriste na, wa?» na, ka da løvey køne ba. ⁷ Asaya, «Ma da gwa nga mbøzey a wuzlah ndøhay mamøctakaya na, wa?» na, ka da løvey køne ba may. Anda meløvey, ka da wulkam amba ndaw a daw a wuzlah ndøhay mamøctakaya nga zølwa Køriste na, køne ba. ⁸ Mawuzlalakaya daa ɗerewel nga Gazlavay, a løvey: «Mey nga Gazlavay aa da cakay akah, ba na, døren̄ ta kah ba. Aa da baazlam akah ta daa mevel akah.» Yaw, mey a na, ara mey masa ala ma wuzdamatara ngada ndøhay amba a tøbmara. ⁹ Da kah ta mey akah, kah maa guzley la fa mey nga ndøhay, ka løvey: «Yesu

10:3 10.3 1.17 10:4 10.4 Gal 3.24-25 10:5 10.5 Lev 18.5; Gal 3.12
10:6 10.6-8 Mew 30.12-14

na, ara Bay Mahura,» asaya, da ka ta tɔba la ta mevel akah cɔpa Gazlavay ta slɛkɔadɔrwa sem daa memɔcey na, ɲgene, Gazlavay a lɔhdaka la. ¹⁰ Ndaw ma pa Gazlavay ɲga ndaw ɲga fara fara la na, Gazlavay a, a pa ndaw aha ɲga ndaw maaya fa mey ɲga la. Asaya, ndaw maa guzley ta mey ɲga, a lɔvey: «Yesu ara Bay Mahura» na, Gazlavay a lɔhda ndaw a la. ¹¹ Ahaw, mawuzlalakaya daa ɔerewel ɲga Gazlavay, a lɔvey: «Kwa waawa ma pa Gazlavay ɲga ndaw ɲga fara fara na, a zɔley marava daa ba sɔlak.»

¹² Anda keɔe, ndaw *Jɔwif ta ndaw Jɔwif ba na, ata letek. Ata cɔpa bay ata na, pal, ara Bay Mahura, ndaw ma katar maaya daa masa ata faa cɔfɔamara ɲga jɔnta.

¹³ Anda mawuzlalakaya daa ɔerewel ɲga Gazlavay, ma lɔvey: «Kwa waawa maa cɔfɔa Bay Mahura ɲga lɔhda na, Bay Mahura ha a lɔhda la.»

¹⁴ Kaa da ndɔhay ta pamara Bay Mahura ha ɲga ndaw ata fara fara daa ba na, a daa cɔfɔamara ɲga lɔhdata na, kwara? Yaw, kaa da ndɔhay ta cɔndamara mezɔley ɲga Bay Mahura ha daa ba na, a da pamara ɲga ndaw ata fara fara ha na, kwara? Asaya, kaa da ndaw ta wuzey mey da ray Bay Mahura ha daa ba na, ndɔhay a da cɔndamara mey da ray a na, kwara? ¹⁵ Kaa da ndɔhay maslɔrdatakaya ɲga wuzey mey a daa ba na, a da wuzdamara mey da ray Bay Mahura ha na, kwara? Anda mawuzlalakaya daa ɔerewel ɲga Gazlavay, ma lɔvey: «Cek ma mbey anda ndɔhay ma diyam ɲga wuzey *Mey-maaya-mawiya a ndɔhay na, daa ba.» ¹⁶ Ama ndɔhay tabiya ta tɔbmara Mey-maaya-mawiya ha aa mevel ata na, daa ba. Ara anda *Izay, *ndaw ma tɔla mey ɲga Gazlavay maa guzley zleezle, ma lɔvey: «Waa Bay Gazlavay, ma tɔba mey ala

masa ala ma wuzdamara da ray akah na, wa?» ¹⁷ Anda keɗe, amba ndaw a tɔɓa mey nga Gazlavay na, si a cɔnda mey a la ɗagay. Mey masa aa ma cɔnda ha na, ara mey nga Kɔriste.

¹⁸ Da anda keɗe na, ya wuɗey nga sɔra Jɔwif hay na, ta jɔkam slɔmay fa Mey-maaya-mawiya ha daa ba fara daw? Fara fara, ta jɔkam slɔmay la. Ara anda mawuzlalakaya daa ɗerewel nga Gazlavay, ma lɔvey:

«Ndɔhay ta diyam la nga wuzey mey nga Gazlavay
da bɔla tabiya.

Day ata ta cɔney la aa wura aa wura cɔpa,
kwa aa slam masa dɔrej.»

¹⁹ Ya wuɗey nga sɔra saya, *Israyel hay na, ta cɔndamara mey a daa ba fara daw? Fara fara ta cɔndamara la, ama ta gɔmam nga tɔɓmara daa ba. Ya sɔra anda keɗe na, maja Gazlavay taa guzlar la dɔga zleezle ta mey Mawiz, a lɔvey:

«Ya da tɔrdakwar nga ndɔhay ma ka sɔlej
fa ndɔhay daa sɔkway hay saw kɔne.

Ya da ka amba mevel akwar a cey a ray ndɔhay
masa daa sɔkway hay manjar lenjesl.»

²⁰ Fa dɔɓa ha Izay may, ta zlurey ngaa guzley daa ba, a lɔvey:

«Gazlavay a lɔvey:

Ndɔhay masa ta sɔpmaya daa ba na,
ta hɔtmaya la ta dey ata.

Ya ta wuzda vaw aɗaw la ngada ndɔhay
masa kwa maa cɔɗamara mey aɗaw daa ba.»

²¹ Da ray ndɔhay Israyel hay na, Gazlavay taa guzley la saya ta mey Izay, a lɔvey:

«Ya vørndey hipas, har aɗaw mawurkaya
 ɲga tɔb̄tɔrwa ndɔhay ma kam hɔma a ray aɗaw
 amba a vɔhmawa, ama ata ta cɔnmaya mey daa ba.»

11

Mey da ray Gazlavay ma sɔrfatar dey-ceceh a Israyel hay

¹ Yaw, ya wuɗɗey ɲga sɔra saya, da anda kaa na, Gazlavay ta mbɔɗtar dɔba sem a ndɔhay ɲga hay *Israyel hay daw? Kay, daa ba sɔlak! Yah ray aɗaw na, yah ndaw Israyel, yah daa sɔkway ɲga Benjamenɲ. Benjamenɲ e may, ara ndaw daa sɔkway ɲga *Abɔraham. ² Fara fara, Gazlavay ta mbɔɗtar dɔba a ndɔhay ɲga hay Israyel hay masa aa ma walata dɔga zleezle na, daa ba. Ka sɔrfadamara mey mawuzlalakaya daa ɗerewel ɲga Gazlavay da ray *Eli ma tɔway fa mey ɲga Gazlavay maja Israyel hay heyey saba daw? A lɔvey: ³ «Waa Bay Gazlavay, ta kɔɗmata ndɔhay ma tɔla mey akah hay sem cɔpa vagay, mendɔrey yah pal taava aɗaw. Fa sɔpmaya ɲga kɔɗey vagay may. Asaya, ta bɔzlmata slam hay mefɔkey cek ɲgada kah sem.» ⁴ Kaa Gazlavay a mbɔɗɗara a Eli a na, kwariya? A mbɔɗɗara, a lɔvar: «Kay, mendɔrey kah pal taava akah ba! Ya ta ɓey ndɔhay gabal maasala la ɲgada yah. Ara ndɔhay masa ta namar ray ɲgada kuley mezɔley Bal daa ba.» ⁵ Yah, Pawl, ya fa lɔvkwar, kwa haa wure keɗe na, ɲga letek kɔne may, Gazlavay ta mbɔkey ndɔhay siya la da wuzlah Israyel hay masa ɲga ma walata maja ɲga ma sɔrfatar dey-ceceh. ⁶ Gazlavay a walata ndɔhay a na, maja ɲga ma sɔrfatar

10:21 10.21 Iz 65.2 11:1 11.1 SNM 22.30; 2Kwr 11.22; Gal 1.13-14; Fɔl 3.5 11:2 11.2 11.29; Ps 94.14; Jer 31.37 11:3 11.3-4 1Bay 19.10, 14, 18 11:5 11.5 9.27

dey-ceceh, ba na, maja sløra ata ba. Anja da a walata maja sløra ata na, ŋgene ta sərƒatar dey-ceceh daa ba.

⁷ Kaa wure keƒe, mey a, a wuƒey ŋga ləvey na, kwara? Israyel hay na, ta hətam cek masa ata ma səpmara na, daa ba, si ndəhay nekəƒey masa Gazlavay ma walata na, ta hətam la. Har-gədaŋ ŋga ndəhay da wuzlah ata na, ta wuƒam ŋga cəndamara ƒay ŋga Gazlavay na, daa ba. ⁸ Anda mawuzlalakaya daa ƒerewel ŋga Gazlavay, ma ləvey: «Gazlavay ta ŋgərƒatara ray ata sem, ta wulfatara dey ata sem, ta dəzltara sləmay ata sem, haa wure keƒe ata kəne cəŋga.» ⁹ Bay *Davit taa guzley la saya, a ləvey: «Cek hay masa ata ma zəmamara ŋgene na,

ŋga kərzata fa ƒay anda ŋgam-ŋgam ma kərzey cek, anja ŋga tərey ŋga vəgeƒ amba a təƒam a hwaf a, a səram banay təƒe fa sløra ata.

¹⁰ Anja dey ata ŋga wulfey amba a hətmar dey saba, anja ŋga gəbdamara dəbā mandaw mandaw maja banay ata.»

¹¹ Ya wuƒey ŋga səra mey a saya, *Jəwif hay ma zlaŋgaƒam daa cəveƒ ŋga Gazlavay na, ta zlaŋgaƒam sem ŋga tar fara daw? Kay, daa ba səlak. Ama maja mebərey masa ata ma kamara na, ndəhay masa Jəwif hay ba hay ata ta cəveƒ ŋga ləhey daa mebərey. A key anda ŋgene na, amba Jəwif hay a, a kam sələŋ ta ndəhay masa Jəwif hay ba hay. ¹² Jəwif hay ta kam mebərey la, maja ŋgene, Gazlavay ta katar maaya la a ndəhay da bəla tabiya. Jəwif hay ta zlaŋgaƒam sem daa cəveƒ ŋga Gazlavay, maja ŋgene, Gazlavay ta', a pəstar mey a ndəhay masa Jəwif hay ba hay. Yaw, da Gazlavay ta katar maaya la a ndəhay masa Jəwif hay ba hay maja Jəwif hay

ta zlanɣaɗam sem daa cəvedɗ anɣa na, kaa wara a katar maaya ma fəna ta pas masa ndəhay Jəwif hay tabiya ma da vəhmawa fa vəɗa nɣa ləhey, ba daw?

Mey da ray ndəhay masa Jəwif hay ba hay ma da ləham

¹³ Wure keɗe, ya wuɗey nɣaa guzlkwar nɣada akwar ndəhay masa *Jəwif hay ba hay. Yah na, *ndaw-meslərey nɣa Yesu masa Gazlavay ma slərdərwa nɣa wuzey mey nɣada akwar ndəhay masa Jəwif hay ba hay. Ya faa səmey ga da ray sləra aɗaw a. ¹⁴ Ya wuɗey na, səkway aɗaw hay Jəwif hay a nəkam dey fa sləra masa yah ma ka da wuzlah ndəhay masa Jəwif hay ba hay, a səpam cəvedɗ amba Gazlavay a ləhdata may. ¹⁵ Masa Gazlavay ma mbəɗtar dəba sem a ndəhay aɗaw Jəwif hay na, ta', a cəmtar ɗay nɣa ndəhay siya da bəla ta anɣa ray anɣa. Da anda keɗe na, ta pas masa Gazlavay ma da təbta aa slam a na, ma da key na, me? Cek maaya a key la. Ndəhay masa maməctakaya a sləkɗamawa la daa meməcey.

¹⁶ Sərmara, da ta cam peŋ la teesɗ nɣa vəley nɣada Gazlavay na, peŋ e siya tabiya na, ara nɣa Gazlavay a may. Asaya, da a vəlmar slaslalay hay nɣa wudez na, mey-har hay nɣa wudez e cəpa nɣada anɣa may. ¹⁷ Səkway nɣa *Israyel hay na, anɣa anda wudez maaya marəvkaya masa mey-har hay siya maɗəsltakaya. Ama akwar masa Jəwif hay ba na, akwar anda mey-har hay nɣa wudez saw manjəbtakaya fa wudez maaya marəvkaya masa mey-har hay siya maɗəsltakaya heyey. Wure keɗe, ka da hətam cek maaya maja akwar manjəbtakaya fa wudez maaya heyey. ¹⁸ Da anda kaa na, ka da rəsmata ndəhay masa anda mey-har hay nɣa wudez maɗəsltakaya nɣene ba.

Akwar fa zlapam da ray ata na, maja me? Akwar na, mey-har hay gway. Ma kərza slaslalay na, ara mey-har hay ba, ama ara slaslalay ma kərza mey-har hay, ba diya?

¹⁹ Da kwa ndəhay siya da wuzlah akwar a daa guzlam, a ləvam: «Gazlavay a dəsłta mey-har hay a na, amba a njəbey yah aa slam aha.» ²⁰ Ahaw, kəne fara. Ama Gazlavay a dəsłta na, maja ata ma pamara ŋga ndaw ata fara fara daa ba. Yaw, aŋga ma njəbkwar aa slam ata na, maja akwar ma pamara ŋga ndaw akwar fara fara. Maja ŋgene, ka da zlapam saba, ama maaya na, ka zluram ta Gazlavay. ²¹ Jəwif hay na, ara ndəhay masa mapatakaya anda mey-har ŋga wudez masa maaya. Da Gazlavay ta sərfatar dey-ceceh daa ba na, ka wulkam a sərfakwar dey-ceceh la daw?

²² Nəkmara, Gazlavay na, a gwa a key maaya a ndaw, asaya, a gwa a cey mevel a ray ndaw may. Aŋga na, fa cey mevel da ray ndəhay masa ma zlaŋgaɗam sem daa cəved aŋga. Ama faa həmdakwar, akwar ndəhay masa daa cəved aŋga. Si ka kamar cek ma mbafar mandaw mandaw, da daa ba na, a da dəsłkwar anda mey-har hay ŋga wudez e may. ²³ Jəwif hay na, da ata ta vəhmawa sem aa cəved ŋga Gazlavay, a pamara ŋga ndaw ata fara fara na, Gazlavay a, a njəbta la aa slam ata fa wudez masa maaya heyey saya, maja Gazlavay aa ta gədaŋ ŋga vəhdatərwa, a njəbta aa slam ata cəŋga. ²⁴ Akwar ndəhay masa Jəwif hay ba, akwar na, anda mey-har hay ŋga wudez saw da ley masa ma dəsłmərwa ŋga njəbey fa wudez masa maaya. Yaw, da Gazlavay ta gwa ŋga ka cek masa ta banay anda keɗe sem na, ka wulkam aŋga ta banay amba a vəhdatərwa Jəwif hay masa mapatakaya ta cakay heyey aa slam ata daw?

Mey da ray Israyel hay ma da ləham daa mebərey

²⁵ Məlma aɗaw hay, ya wuɗey ka səmra mey maɓadakaya daha, amba ka pamara ray akwar ŋga ndəhay ma səra cek kalah ba. Ahaw, *Israyel hay siya na, ray ata maŋgərɗakaya. Ama ta pas masa ndəhay *Jəwif hay ba hay masa Gazlavay ma wuɗey ŋga ləhdata ta ləham cay na, Israyel hay siya hay a na, a mbəɗdamara menjey ata la, a pamara Gazlavay ŋga ndaw ata fara fara.

²⁶ Anda keɗe na, Gazlavay a ləhdata ndəhay Israyel hay la cəpa anda mawuzlalakaya daa ɗerewel ŋga ma ləvey: «Ndaw ma da ləhdata ndəhay a da bawa

daa ŋgwa ŋga *Siyarw*.

A da mbəkdatara mebərey ŋga ndəhay daa səkway ŋga Jakwap.

²⁷ Keɗe he na, ara *mejəwey-mey aɗaw ta ata ta pas masa yah ma da mbəkdatara mebərey ata.»

²⁸ Ata ta təɓmara *Mey-maaya-mawiya daa ba, anda keɗe, ta təram sem ŋga masa-gəra hay ŋga Gazlavay. A key anda keɗe na, amba akwar ndəhay Jəwif hay ba hay na, Gazlavay a ləhdakwar daa mebərey. Ama taa slam laŋgar Gazlavay ta walata la maja ata na, ndəhay ŋga hay mawuɗtakaya kalah, asaya, maja ta jəwam mey la ta papaŋ ŋga papa ata hay zleezle. ²⁹ Da Gazlavay ta wala ndaw sem, asaya, da ta kar maaya la a ndaw a na, a da njeɗ anda ŋgene, fa da mbəɗda mewulkey ŋga daa ba.

³⁰ Akwar ndəhay masa Jəwif hay ba hay na, zleezle akwar fa namar ray a Gazlavay daa ba. Ama Gazlavay ta sərfakwar dey-ceceh la wure keɗe, maja ndəhay Jəwif hay ma namar ray ba. ³¹ Wure keɗe masa ata ma namar

11:25 11.25 Mt 24.14; Jan 10.16 * 11:26 11.26 ŋgwa ŋga Siyarw: A wuɗey ŋga ləvey ndəhay Jəwif hay, da daa ba, berney ŋga Jeruzelem. 11:26 11.26-27 Iz 59.20-21; 27.9; Jer 31.33-34 11:29 11.29 3.3-4; 15.8

ray a Gazlavay ba ṅgene na, Gazlavay ta sɛrfakwar dey-ceceh la aa slam a ṅga ata. A key anda keḏe amba ata may, a mbɛḏdamara menjey ata amba Gazlavay a sɛrfatar dey-ceceh. ³²Yaw, anda keḏe, Gazlavay na, ta vɛltar cɛved la a ndɔhay tabiya amba a namar ray ba. A ka anda keḏe amba aṅga may, a sɛrfatar dey-ceceh a ndɔhay ndav.

Mey da ray gɔdan ṅga Gazlavay

³³ Nɔka! Gazlavay fa sɛrfatar dey-ceceh fara fara a ndɔhay. Aṅga ndaw ta lɛṅgesl, a sɛrta cek hay tabiya. Cek masa daa mevel aṅga na, ndaw ma gwa ṅga sɛra daa ba. Cek masa aa ma wuḏey ṅga ka na, ndaw ma gwa ṅga sɛra daa ba. ³⁴Anda mawuzlalakaya daa ḏerewel ṅga Gazlavay ma lɔvey:

«Ma sɛra mewulkey ṅga Gazlavay na, wa?

Ma gwa ṅga kɛta Bay Gazlavay na, wa?

³⁵ Ma vɛlar cek a Gazlavay

ma fɔna cek masa aa ma vɛldara na, wa?

Kwa ndaw pal daa ba sɛlak.»

³⁶ Ma lɛmtɛrwa cek hay cɛpa na, ara aṅga. Fa nɛkfatar dey fa cek hay a tabiya amba cek hay a, a njam na, dasi har aṅga. Anja ndɔhay ṅga hɛlmamara Gazlavay ṅga sɛrmataw. *Amen.

12

Ya da kakwar slɛra a Gazlavay na, kwara?

¹ Mɛlma aḏaw hay, Gazlavay ta sɛrfakwar dey-ceceh la ga kalah. Anda keḏe, ambahw, vɛldamara ray akwar tabiya ṅgada aṅga. Da ka vɛldamara ray akwar tabiya ṅgada aṅga ha na, a key ṅgene, ka vɛlmar cek maaya ma mbafar. Keḏe ara cɛved masa fara fara ṅga ney ray a

11:32 11.32 3.22; Gal 3.22 11:33 11.33 Jɔw 11.7; Ps 139.17 11:34
11.34 Jɔw 15.8; Iz 40.13 11:35 11.35 Jɔw 41.3 11:36 11.36 16.27;
1Kwr 8.6

Gazlavay. ² Ka da sɔpam kwakwas ŋga ndɔhay masa da bɔla keɔɔe ba. Vɔlmar cɔved a Gazlavay ŋga wey da ray akwar amba mewulkey akwar a mbɔɔɔey, mevel akwar a key maaya. Da akwar fa kamara anda keɔɔe na, ka sɔrmara cek masa Gazlavay ma wuɔɔey la. Anda melɔvey, ka sɔrmara cek masa maaya, ma mbafar, masa fara fara anda anɔa ma wuɔɔey.

³ Gazlavay na, ta kaya maaya la, ta paya la ŋga ndaw anɔa meslɔrey. Ara maja ŋgene, ya fa lɔvkwar ŋgada akwar tabiya, ndaw a da pa ray anɔa ŋga ndaw mahura ma fɔna gɔɔɔɔɔ anɔa ba. Ama kwa waawa ŋga nɔka gɔɔɔɔɔ anɔa amba a sɔra anɔa na, kwara. Kwa waawa ŋga nɔka menjey anɔa tɔɔɔe ta masa aa ma tɔba mey ŋga Gazlavay ŋgene na, cay gway. ⁴ Ka sɔrmara kwa waawa da wuzlah akwar na, anɔa ta vaw pal, ama mezɔvey hay fa vaw a na, ata ga. Kwa mezɔvey wura wura na, anɔa ta slɔra anɔa wal. ⁵ Alɔkwa may kɔne, alɔkwa ga, ama alɔkwa cɔpa ya ta tɔrkwa sem ŋga vaw pal maja alɔkwa macɔmkaya ta *Kɔriste. Alɔkwa tabiya macɔmkaya pal anda mezɔvey ŋga vaw macɔmkaya fa vaw ŋga ndaw pal. ⁶ Gazlavay ta vɔlndakwar gɔɔɔɔɔ la mekele mekele anda aa ma wuɔɔey ŋga vɔlda a ndaw a, ndaw a. Anda keɔɔe, kwa waawa ŋga kada slɔra ta gɔɔɔɔɔ masa Gazlavay ma vɔldara ha. Da ndaw anɔa ta gɔɔɔɔɔ ŋga tɔley mey ŋga Gazlavay na, ŋga tɔley mey masa Gazlavay ma wuzdara ŋgene gway. ⁷ Da ndaw aa ta gɔɔɔɔɔ ŋga jɔney ndɔhay na, maaya a jɔnta. Da ndaw aa ta gɔɔɔɔɔ ŋga sɔrkedey ndɔhay na, maaya aa sɔrkadata. ⁸ Da ndaw aa ta gɔɔɔɔɔ ŋga dɔktar mevel a ndɔhay amba a hɔtam gɔɔɔɔɔ na, maaya a dɔktar mevel.

12:1 12.1 6.13; 1Pi 2.5 12:2 12.2 Ef 4.22-24; 1Tes 5.21 12:3 12.3 1.5;
Mt 20.26; 1Kwr 12.11, 28; Ef 4.17 12:4 12.4-5 1Kwr 12.27 12:6 12.6-8
1Kwr 12.4-11; 12.27-14.40; 1Pi 4.10-11 12:7 12.7-8 SNM 6.1-3; 2Kwr 9.5, 7

Da ndaw aa ta gədan̄ nga wunka cek an̄ga ta ndəhay na, nga vəlda ta mevel maaya. Da ndaw aa ta gədan̄ nga key *bay-ray daa *mecəmey-ray nga ndəhay nga Yesu na, nga ka sləra an̄ga ta cəved̄ e. Da ndaw aa ta gədan̄ nga key maaya a ndəhay masa daa banay na, nga katara ta meesəmey.

⁹ Si ka wuɖam vaw da wuzlah akwar ta mevel pal, ba na, ka da wuɖam vaw ta mey daada ba. Ka da təbmara nga key cek hay malamba ba. Ama səpam na, nga key cek masa maaya ta cəved̄ e. ¹⁰ Wuɖam vaw da wuzlah akwar maja akwar cəpa na, məlman̄ hay daa mecəmey-ray nga ndəhay nga Yesu. Anja kwa waawa nga nar ray a ndaw a, ndaw a da wuzlah akwar ta mevel maaya. ¹¹ Vəldamara ray akwar nga key sləra ta gədan̄ akwar cəpa. Ka da təram ndəhay masa-mayaɖ hay ba. Kamar sləra a Bay Mahura ta mevel akwar ndav. ¹² Akwar fa səkwam cek masa Gazlavay ma ləvey a da vəldakwara. Anda keɖe, sasəmam mandaw mandaw. Da akwar daa banay na, bəsmara banay a. Kam gədan̄ nga dərey dangay mandaw mandaw. ¹³ Ndəhay nga Gazlavay masa cek ata hay daa ba na, jənmata, asaya, təbmata maaya maaya a way akwar hay.

¹⁴ Ndəhay masa ma sərdamakwar banay na, cacəɖɖamara Gazlavay nga pəstar mey. Cacəɖɖam na, amba Gazlavay a pəstar mey, ba na, a nəsta ba. ¹⁵ Yaw, da ndəhay ata daa meesəmey na, sasəmam bama. Da ndəhay ata daa matəway na, təwam bama. ¹⁶ Akwar da wuzlah akwar na, njam ɖay macəmkaya letək. Ka

12:9 12.9 2Kwr 6.6; 8.24; 1Tm 1.5; 1Pi 1.22; 1Kwr 13.4-7 12:10 12.10 14.15; Jar̄ 13.14-15; Gal 5.13; 6.3, 10; Ef 4.2; Fəɭ 2.2-3 12:11 12.11 8.9; Gal 5.25; CWJ 3.15 12:12 12.12 5.2-3; 8.24-25; Mt 24.13, 22; Lk 18.1; 1Kwr 10.13; 1Tes 2.14 12:13 12.13 Gal 6.10; Heb 13.2 12:14 12.14 Mt 5.44 12:15 12.15 jəw 30.25; 1Kwr 12.26; 2Kwr 11.29

da sɔpam ɲga tɔrey mahura da ray ndɔhay siya daa mecɔmey-ray akwar ba. Kwa slɔra masa wura wura na, kamara ta meney ray. Ka da pamara ray akwar ɲga ndɔhay ma sɔra cek hay kalah ba.

¹⁷ Da ndaw ta kakwar cek maaya ba la na, ka da madamara a ndaw a ba. Ama sɔpam na, ɲga key cek hay masa maaya masa ndɔhay maa hɔmdamara. ¹⁸ Anja da ka gwamara na, kam cek hay masa tɔɔɔ ta gɔɔɔ akwar amba ka njam ta ndɔhay tabiya daa zazay. ¹⁹ Jam aɔfaw hay, da ndaw ta kakwar cek maaya ba la na, ka da madamara a ndaw a ba. Mbɔkdamara amba Gazlavay a cey mevel a ray a, maja mawuzlalakaya daa ɔerewel ɲga Gazlavay, Gazlavay a lɔvey: «Cek masa ndaw ma ka maaya ba na, ma da pɔla na, yah. Ara yah, ma da kar cek maaya ba.» ²⁰ Mawuzlalakaya daa ɔerewel ɲga Gazlavay saya, a lɔvey: «Da masa-gɔra akah, may fa car na, vɔlar cek ɲga zɔmey. Da yam fa kar na, vɔlar yam ɲga sey. Da ka fa ka kɔne na, hwaray a kar la, a mbɔɔda menjey ɲga la.» ²¹ Ka da mbɔkda ray akah ɲga hɔbey maja ndaw ma kaka cek maaya ba amba ka madara na, kɔne ba. Ama si ka key cek maaya amba ka key bay-gula da ray cek maaya ba ha.

13

Mey da ray meney ray ɲgada bay-ray hay ɲga ɲgwamna

¹ Maaya na, kwa waawa a natar ray ɲgada *bay-ray hay ɲga ɲgwamna, maja kwa waawa ma key bay-ray na, ara Gazlavay ma vɔldara. Yaw, bay-ray hay tabiya ɲga ɲgwamna na, ara Gazlavay ma pata. ² Anda keɔɔ, kwa

12:16 12.16 MM 3.7; 1Kwr 1.10-11, 19-20, 27-28; 8.1 12:17 12.17 MM 20.22; 1Kwr 6.7; 1Tes 5.15; 1Pi 3.9 12:19 12.19 Mew 32.35; Mt 5.39 12:20 12.20 MM 25.21-22; Mt 5.44 13:1 13.1 MM 8.15-16 13:1 13.1-7 SNM 5.29; Tit 3.1; 1Pi 2.13-14; CWJ 13; 20.4

waawa ma natar ray ba na, a key ηgene a mbəkda cəved masa Gazlavay ma wuɗfey. Ndaw ma natar ray a bay-ray hay a ba na, sariya a tɔɗda la. ³ Ndaw ma key cek ta cəved e na, a zlurey ta bay-ray hay ηga ηgwamna ba, ama ndaw ma key cek ta cəved e ba na, si a zlurey ta ata. Ka wuɗam ηga zlurey ta bay-ray hay ηga ηgwamna ba, ba diya? Anda keɗe, si ka kam cek ta cəved e amba aa hɔmdamakwar. ⁴ Fara fara bay-ray hay ηga ηgwamna na, fa kamar slɔra ηgada Gazlavay ηga jɔnkwar amba ka kam cek ta cəved e. Ama da akwar fa kam cek ta cəved e daa ba na, si ka zluram ta bay-ray hay a, maja ata ta gɔɗaη ηga sɔrdamakwar banay. A da sɔrdamakwar banay a na, ηga tede ba. Da ndɔhay ma ka cek ta cəved e ba, bay-ray hay a fa sɔrdamata banay na, a key ηgene, a kamar slɔra a Gazlavay. Anda keɗe, ata fa wuzdamɔrwa na, Gazlavay fa cey mevel a ray ndɔhay ma ka cek ta cəved e ba. ⁵ Da anda keɗe na, aηga maaya amba ka namatar ray a bay-ray hay ηga ηgwamna. Ka namatar ray na, maja Gazlavay ma da sɔrdakwar banay daada ba, ama maja ka sɔrmara ara cek ta cəved e.

⁶ Ara maja ηgene, akwar ma pɔlam budaw may. Ndɔhay ma cakala budaw a na, ara ndɔhay masa Gazlavay ma pata ηga ka slɔra ha. ⁷ Cek masa ndɔhay ηga ηgwamna ata ta cəved ηgaa cɔɗɗafamakwar na, vɔldamatara. Da ara budaw na, vɔldamatara a ndɔhay ma cakala budaw a. Da ara dala ηga cek mekele masa ηgwamna maa cɔɗɗafakwar na, vɔldamara. Da ara ηga ney ray ηgada bay-ray hay ηga ηgwamna na, namatar ray.

Mey da ray menjey ta mewuɗfey-vaw

⁸ Ka da njam ta dɔvaz ηga ndaw da ray akwar ba. Ama dɔvaz pal da ray akwar daha amba ka pɔlmara mandaw

mandaw. Dəvaz a na, ara mewudəy-vaw da wuzlah akwar. Ndaw ma wudəy ndaw na, a key a nar ray fara fara ŋgada kwakwas ŋga Gazlavay. ⁹ Gazlavay a ləvey: «Ka da ley vaw saw ba, ka da kəḏəy ndaw vagay ba, ka da leley ba, ka da key dey fa cek ŋga ndaw ba.» *Mewey hay a keḏe ta siya hay cəpa na, macəmkaya daa mey pal ma ləvey: «Wuḏa meseembew akah anda kah ma wuḏa ray akah.» ¹⁰ Ndaw ma wudəy ndaw na, kwa fa da kar cek maaya ba ŋgada ndaw aha daa ba. Anda keḏe, da ka wudəy ndaw na, a key ŋgene, ka nar ray maaya maaya a kwakwas ŋga Gazlavay.

Mey da ray mewey vaw ŋga səkwey Yesu ma da vəhwa

¹¹ Wure keḏe na, ka sərmara, pas a ta wuswa cay. Ara pas masa akwar ma da sləkḏam daa ḏar. Ahaw, pas masa Gazlavay ma da ləhdakwar da bəla keḏe na, aa gweegwe cay. Pas a na, aa gweegwe da ray pas masa akwar ma təbmara mey ŋga Yesu təlām heyey. ¹² Tavaḏ fa ndəvey *, mamba slam a wurey †. Anda keḏe, ya da kakwa cek maaya ba anda ndəhay daa ləvaŋ saba. Ama jəwkwa vaw ta cek hay ma ka vəram ŋga key bay-gula da ray cek hay maaya ba anda ndəhay daa slam-mewedəy. ¹³ Maaya na, menjey aləkwa a key maaya anda ndəhay daa slam-mewedəy. Anda meləvey, ya da kakwa wasa malamba ba, ya da wakwa ba, ya da lakwa vaw saw da palah ba, ya da

13:8 13.8-10 Jarj 13.34; 1Kwr 13; 16.14; Gal 6.10 13:9 13.9 Mew 5.17-21; Lev 19.18; Mt 22.34-40; Gal 5.14; Jak 2.8-13 13:11 13.11 Ef 5.14-16; 1Kwr 7.29-31 13:11 13.11-12 1Tes 5.5-8 * 13:12 13.12 tavaḏ fa ndəvey: Ara mey-menjey da ray bəla keḏe ta ndəhay ma kam mebərey. A wudəy ŋga ləvey bəla gweegwe a ndəvey. † 13:12 13.12 mamba slam a wurey: Ara mey-menjey da ray maaya ŋga Gazlavay ma da sawa a ray ndəhay. Ara pas masa aləkwa ma da njakwa ta Gazlavay da vad. 13:12 13.12 Ef 5.11; 6.11, 13; 1Jn 2.8

kakwa cek hay malamba ba, ya da tərkwā vaw ba, asaya, ya da kakwa sələj fa cek ŋga ndaw ba may. ¹⁴ Anja maaya na, ka vəlmar cəved a Bay Mahura Yesu *Kəriste ŋga wey da ray akwar. Cek hay malamba masa akwar ma wuɗam kalah na, ka da kamara saba.

14

Mey da ray ndəhay masa ta gədaŋ leŋ da ray ndəhay masa ta gədaŋ pəreh

¹ Ndəhay masa ta gədaŋ pəreh daa mey ŋga Gazlavay na, təbmata a wuzlah akwar. Ka da mbəɗmatar ray da ray mewulkey ata ba. ² Ya wuɗey ŋгаа guzlkwar na, da ray cek mezəmey. Ndəhay siya a wulkam na, cek hay tabiya mezəmey. Anda keɗe, ata na, a zəmamara cek hay tabiya. Ama ndaw masa ta gədaŋ pəreh daa mey ŋga Gazlavay na, a zlurey ŋga zəmey cek wura wura *, a zəmey na, si gwaslaf ŋga lar daada gway. ³ Anda keɗe, ndaw masa ma zəmey aslaw na, a da rəsa ndaw masa ma zəmey gwaslaf ŋga lar daada gway ba. Yaw, ndaw masa ma zəmey gwaslaf ŋga lar daada gway na, a da mbəɗar ray a ndaw masa ma zəmta cek hay tabiya ba may, maja ata cewete Gazlavay ta təbta sem, ta mbəkdata daa ba. ⁴ Kaa kah na, wa amba ka mbəɗar ray a ndaw ma ka sləra ŋga ndaw mekele na! Da ndaw a, a key sləra maaya, da a key sləra maaya ba na, si bay aŋga ma da nəka sləra aŋga ha gway. Fara fara, ndaw a, a key sləra ta cəved e la, maja

13:13 13.13 Lk 21.34; Ef 5.18 13:14 13.14 Fəl 2.5; Kwa 3.15 14:1
14.1 15.7 14:1 14.1–15.6 1Kwr 8.1–13; 9.22; 10.23–33; Kwa 2.16, 20–22;
1Tm 4.4–5; Heb 13.9 * 14:2 14.2 a zlurey ŋga zəmey cek wura
wura: Ndəhay a zluram ŋga zəmey cek wura wura na, maja aslaw masa kwakwas ŋga Jəwif hay ma təkā sem, a
wuɗam ŋga zəmey ba, asaya, a wuɗam ŋga zəmey aslaw ŋga kuley ba. 14:2 14.2 Dan 1.8; 1Kwr 10.25–28

Bay Mahura, bay anġa, aa ta gədan ġga jəna ndaw ma ka sləra ha ġga key sləra maaya.

⁵ Ndaw mekele a wulkey đar hay mekele na, maaya a fəna đar hay siya. Ndaw mekele saya a wulkey đar hay cəpa na, ata letek. Anda keđe, anja kwa waawa ġga səra cek masa anġa ma wulkada daa mevel anġa maaya maaya.

⁶ Ndaw masa ma wulkey đar hay mekele a fəna siya hay na, a key ġgene, a wuđeġ ġga həslar ray a Bay Mahura Yesu. Yaw, ndaw masa ma zəmta cek hay cəpa na, a key ġgene, a wuđeġ ġga həslar ray a Bay Mahura may, maja fa kar suse a Gazlavay fa cek hay masa anġa ma zəmta ha. Asaya, ndaw masa ma zəmta cek hay cəpa ba na, a key ġgene, a wuđeġ ġga həslar ray a Bay Mahura may, maja fa kar suse a Gazlavay fa cek hay masa anġa ma zəmta ha.

⁷ Ya sərkwə, kwa aləkwa ta dey da bəla keđe, kwa aləkwa ta məckwa sem na, ya wakwa ray aləkwa ba. ⁸ Daa masa aləkwa ta dey keđe na, aləkwa manjatakaya ġga kar sləra a Bay Mahura. Yaw, da masa aləkwa ma məckwa sem may, ya məckwa na, ġga həslar ray a Bay Mahura. Anda keđe, kwa aləkwa ta dey, kwa aləkwa maməctakaya na, aləkwa cəpa ndəhay ġga Bay Mahura Yesu *Kəriste.

⁹ Sərmara, Kəriste ta məcey la, ama ta sləkđawa sem daa meməcey a ġga key bay ġga ndəhay masa ta dey ta masa maməctakaya. ¹⁰ Da anda keđe na, kah, ka mbəđar ray a məlmakw, ka me? Kah, ka rəsa məlmakw, ka me? Aləkwa cəpa na, ya da nakwa fa mey ġga Gazlavay, a kandakwar sariya. ¹¹ Anda mawuzlalakaya daa đerewel ġga Gazlavay, ma ləvey:

«Yah, Bay Gazlavay masa ta dey, ya fa ləvey fara fara,
ndəhay tabiya a da ragadam fa mey ađaw,

kwa waawa a da høslya ray,
a da løvey yah na, Gazlavay anğa.»

¹² Anda keđe, kwa waawa a da kada cek masa anğa ma ka fa mey nğa Gazlavay.

Mey da ray mepey lenjgesl fa mølman hay mekele mekele

¹³ Da anda keđe na, ya da mbøđtakwar ray a mølma aløkwa hay saba. Ka da kam cek nğa hølda mølmakw akwar nğa key mebørey ba. ¹⁴ Yah na, yah ndaw nğa Bay Mahura Yesu. Anda keđe, ya søra fara fara, cek matøkakaya nğa zømey na, daa ba. Ama da ndaw a wulkey cek keđe anğa maaya ba nğa zømey na, cek aha aa maaya ba na, nğada anğa gway. ¹⁵ Anda keđe, da mølmakw a cey mevel a ray akah maja kah ma zømey cek wura wura na, ngene ka ta søpey mewuđey-vaw daa ba. *Køriste a møcey na, maja anğa may. Maaya na, anja cek masa kah ma zøma na, aa zøđda mølmakw ba. ¹⁶ Da ka wulkey cek aha anğa maaya nğa key, ama ka nøka ndøhay fa pamara nğa cek maaya ba na, ngene, ka da ka ba. ¹⁷ Mewey nğa Bay Gazlavay da ray ndøhay na, ara mey da ray cek mezømey ta cek mesey ba. Ama mewey nğa Gazlavay da ray ndøhay na, ara menjey maaya fa Gazlavay, menjey daa zazay, asaya, menjey daa meesømey masa Mesøfney anğa ma vøldørwa. ¹⁸ Yaw, da ndaw a kar sløra a Køriste anda keđe na, a mbafar a Gazlavay la, asaya, ndøhay aa hømdamara ndaw a la may.

¹⁹ Maja ngene, kakwa gøđan nğa key cek ma handawa zazay ta nğa key cek ma jønndakwar nğa høtey gøđan daa mey nğa Gazlavay da wuzlah aløkwa. ²⁰ Ka da nøsmara sløra nğa Gazlavay ta cek mezømey ba. Ahaw, fara fara

14:11 14.11 lz 45.23-24 14:12 14.12 Gal 6.5 14:13 14.13 1Kwr 10.32;
1Jn 2.10 14:14 14.14 14.23; Mt 15.11; SNM 10.15; Tit 1.15 14:15 14.15
1Kwr 8.1, 11-13; 13; Gal 6.10 14:17 14.17 Mt 6.31-33; 1Kwr 8.8; Gal 5.22-24

cek mezəmey cəpa na, anğa maaya, ama da cek mezəmey a da həlda məlmakw nğa key mebərey na, ngene, nğama kah ma zəma ba. ²¹ Nğama na, ka zəmam aslaw ba, ka sam wuzam ba. Kwa cek wura wura masa ma həlda məlmakw nğa key mebərey na, mbəkdamara. ²² Mey masa akwar ma təbmara da ray mezəmey cek ta da ray mezəmey cek ba na, ka da wuzdamara a ndaw ba, si akwar ta Gazlavay gway. Ndaw masa ma key cek ta mevel anğa cəpa, a wulkey cew cew ba na, maaya nğa Gazlavay aa da ray a. ²³ Ama ndaw masa fa wulkey cew cew da ray cek mezəmey, a zəma cek aha na, ngene, Gazlavay a kar sariya la nğaa zəfda maja ta zəma cek aha ta mevel pal daa ba. Yaw, kwa meeme masa ndaw ma ka ta mevel cew cew na, a key ngene, a key mebərey.

15

Mey da ray mekey maaya nğada ndəhay

¹ Aləkwa ndəhay masa ta gədan daa mey nğa Gazlavay *, maaya na, ya jəntakwa ndəhay masa ta gədan pəreh daa mey a. Ya da kakwa cek masa ma mbafandakwar daada ba. ² Maaya na, kwa waawa a key cek masa ma mbafatar a ndəhay amba a jənta ndəhay nğa hətəy gədan daa mey nğa Gazlavay a dey a, a dey a. ³ Ya sərkwə fara fara, *Kəriste na, ta key cek masa ma mbafar nğada ray anğa na, daa ba. Ama anda mawuzlalakaya daa dərewel nğa Gazlavay, ma ləvey: «Ndəhay ta cəfma la, kah Gazlavay, ama mecəfey a ta vəhwa

14:21 14.21 1Kwr 8.13 14:23 14.23 14.14 * 15:1 15.1 ndəhay masa ta gədan daa mey nğa Gazlavay: Fede Pawl a wudəy nğa ləvey ndəhay masa ta gədan na, ara ndəhay ma səpam kwakwas nğa Mawiz saba, ama ara ndəhay ma pamara Yesu nğa ndaw ata fara fara. 15:1 15.1-2 14.1-2; 1Kwr 8.1-2; 10.23-24

sem a ray aɗaw †.» ⁴ Cek hay tabiya masa mawuzlalakaya daa ɗerewel nga Gazlavay zleezle na, ara ngaa sarkadandakwar mey masa fara fara, amba ya pakwa lenjesl fa cek masa Gazlavay ma ləvey a vɔldandakwara la heyey. Ya pakwa lenjesl na, maja mey mawuzlalakaya daa ɗerewel nga Gazlavay fa vɔldandakwar gɔɗaŋ, asaya, fa jɔndakwar amba ya bɔskwa banay. ⁵ Anja Gazlavay ndaw ma vɔltar gɔɗaŋ a ndəhay ta ma dɔktar mevel a ndəhay nga vɔlkwar mewulkey maaya amba ka njam akwar macɔmkaya ɗay pal anda Yesu Kɔriste ma wuɗey. ⁶ Anda keɗe, akwar tabiya daa slam a, ka da cɔmdamara ɗay akwar pal nga hɔlmey Gazlavay papaŋ nga Bay alɔkwa Mahura, Yesu Kɔriste.

Mey da ray ndəhay cɔpa ma da hɔlmamara Bay Gazlavay

⁷ Tɔbmata ndəhay siya hay anda *Kɔriste ma tɔbkwar. Tɔbmata amba a hɔslmar ray a Gazlavay. ⁸ Ya fa lɔvkwar fara fara, Kɔriste a sawa a bɔla na, nga katar slɔra ngada *Jɔwif hay amba a wuzdatara Gazlavay na, ara ndaw ma mbɔrzley ba. A sawa na, nga key cek masa Gazlavay ma lɔvtar a papaŋ nga papa ata hay zleezle a katara la heyey. ⁹ Asaya, a sawa na, amba ndəhay masa Jɔwif hay ba a hɔslmar ray a Gazlavay maja maaya nŋga, anda mawuzlalakaya daa ɗerewel nga Gazlavay zleezle, ma ləvey:

«Ara maja keɗe, yah ma da hɔslka ray
fa mey nga ndəhay masa Jɔwif hay ba hay.
Ya da hɔlmaka ta walay.»

† 15:3 15.3 mecɔɗey a ta vɔhwa sem a ray aɗaw: Fedɗe a wuɗey nga ləvey «mecɔɗey a vɔhwa a ray Yesu Kɔriste».

15:3 15.3 Ps 69.10 15:4 15.4 1Kwr 10.11; 2Tm 3.16 15:5 15.5 12.16;
Fɔl 2.2-5 15:7 15.7 14.1 15:8 15.8 Mt 15.24; SNM 3.25-26 15:9
15.9 Ps 18.50; Rm 11.13

¹⁰ Mawuzlalakaya daa dferewel nga Gazlavay saya, a ləvey:
«Akwar ndəhay masa Jəwif hay ba,
sasəmam daa slam a ta ndəhay nga Gazlavay.»

¹¹ Mawuzlalakaya saya, a ləvey:
«Akwar ndəhay Jəwif hay ba, həlmamara Bay Gazlavay.
Anja kwa ndaw daa səkway wura wura
nga həlma Bay Gazlavay.»

¹² *Izay, *ndaw ma təla mey nga Gazlavay taa guzley la
saya, a ləvey:
«Ndaw a yawa la daa səkway nga Jese,
a da key bay nga ndəhay masa Jəwif hay ba may.
Ndəhay masa Jəwif hay ba na,
mewulkey ata aa da ray ndaw aha amba a ləhdata.»

¹³ Anja Gazlavay, ndaw ma vəltar gədanj a ndəhay
amba a pam leŋgesl a ray a heyey na, ngaa səmdakwar
mandaw mandaw, anja nga njadakwar daa zazay maja
akwar ma pamara nga ndaw akwar fara fara. Anda
keđe, cek masa anja ma da vəldakwara ha na, akwar fa
səkwmarə ta gədanj nga *Mesəfney nga Gazlavay.

Mey da ray sləra nga Pawl

¹⁴ Məlma ađaw hay, yah ta ray ađaw ya fa ləvkwar,
ya sərə, fara fara akwar na, ndəhay ma wuđam nga key
cek maaya. Ka sərmara mey masa fara fara, ka gwamara
nga kətmata ndəhay mekele ta mey a. ¹⁵ Ta ngenə he
cəpa, daa leeter ađaw keđe, mey hay masa akwar ma
cəndamara cay dəga zleezle na, ya sərfadakwara saya,
ya zlurey ba. Ya zlurey ba na, maja Gazlavay ma kaya
maaya la, ¹⁶ a paya nga key sləra nga Yesu *Kəriste ngada
ndəhay masa *Jəwif hay ba hay. Yah ma vəlda ray ađaw
la fara fara ngada Gazlavay nga wuzey Mey anja maaya

mawiya. Ya wuzdatara mey a, a ndəhay masa Jəwif hay ba, amba a təram n̄ga cek mavəldakaya n̄gada a n̄ga masa ma mbafar kalah, cek masa *Mesəfney n̄ga Gazlavay ma pa wal n̄gada Gazlavay a. ¹⁷ Anda keđe, ya faa səmey ga da ray sləra n̄ga Gazlavay masa yah ma ka maja yah na, macəmkaya ta Yesu Kəriste. ¹⁸ Kwa ya fa da gwa n̄gaa guzley da ray cek mekele na, daa ba, si da ray sləra masa Kəriste ma ka ta fa yah, amba a handatərwa ndəhay masa Jəwif hay ba hay n̄ga namar ray a Gazlavay. A handatərwa na, ta fa mey masa yah ma wuzda lej ta fa cek masa yah ma kata. ¹⁹ Asaya, a handatərwa na, ta fa maazla hay mekele mekele ma rəzley ndaw masa a n̄ga ma kata lej ta fa gəda n̄ n̄ga Mesəfney a n̄ga. Anda keđe, yah ma wuzda *Mey-maaya-mawiya n̄ga Kəriste la dəga da *Jeruzelem haa kasl aa hwayak n̄ga Iliri. Ya ta wuzda mey a la tabiya maaya maaya daa slam hay a n̄gene. ²⁰ Anda meləvey, ya wuzey mey a na, daa hwayak hay masa ndəhay ma cəndamara mey da ray Kəriste daa ba ara n̄. Ya wudfey n̄ga wuzey mey a daa hwayak hay masa ndəhay ma cəndamara mey da ray Kəriste cay ba, maja ndəhay a da wulkam ara anda ya ləmey way a ray salay n̄ga way masa ndaw mekele ma pa. ²¹ Ya ka anda keđe na, ya wudfey n̄ga key anda mawuzlalakaya daa dferewel n̄ga Gazlavay, ma ləvey:

«Ndəhay masa ta wuzdamatara mey
da ray a daa ba ara n̄ na, a hətmar la ta dey ata.
Ndəhay masa kwa ta cənam mey
da ray a daa ba na, a cəndamara mey a la.»

Pawl a wudfey n̄ga daw a Rawm

²² Yah ma wulkey la dey ga nga daw fa akwar a *Rawm, ama ya ta hōtey har daa ba maja slōra ha keḏe. ²³ Mevey ga, ya ta wuḏey la nga daw fa akwar, ama slōra ta tōkya sem. Wure keḏe na, yah ma ndōvda slōra aḏaw cay daa hwayak hay feḏe. ²⁴ Ya wuḏey nga daw fa akwar dōba nga njawa nekōḏey nga kawa matakwa akwar. Fa dōba ha, ya daw la aa hwayak nga Espay. Yaw, ya wuḏey ka jōnmaya nga daw ngadaa hwayak a. ²⁵ Ama wure keḏe na, ya wuḏey nga daw fa ndōhay nga Gazlavay da *Jeruzelem ḏagay nga jōntōrwa, ²⁶ maja ndōhay daa *mecōmey-ray nga ndōhay nga Yesu da Masadōwan ta da Akay ta cakalam dala la nga jōney masa-viya hay daa mecōmey-ray nga ndōhay nga Yesu da Jeruzelem e. ²⁷ Ara mevel ata ma wuḏey nga cekeley dala ha. Ama fara fara si a jōnmata ndōhay a maja ara cek anda dōvaz. Ya lōvey anda keḏe na, maja ndōhay da Masadōwan ta da Akay a ata *Jōwif hay ba, ama ta hōtam maaya nga Gazlavay la ta fa Jōwif hay. Anda keḏe, aṅga maaya amba ndōhay Jōwif hay ba hay a, a jōnmata ndōhay Jōwif hay ta zleley ata hay may.

²⁸ Da yah ma ndōvdōrwa slōra ha cay da Jeruzelem e, asaya, da yah ma vōldatara dala macakalakaya heyey cay a ndōhay fetēḏe na, ṅgene, ya daw aa hwayak nga Espay dōba, ama ya da daw na, ta fa akwar. ²⁹ Ya sōra, da yah ma wusey la fa akwar na, *Kōriste a pōskwar mey la maja yah ma daw a.

³⁰ Mōlma aḏaw hay, ambahw, kakwa gōḏaṅ nga dōrey dangay a Gazlavay ta mevel alōkwa cōpa maja yah. Yaa cōḏakwar kaa na, ta mezōley nga Bay Mahura Yesu Kōriste, asaya, yaa cōḏakwar maja mewuḏey-vaw masa *Mesōfney nga Gazlavay ma handōrwa a wuzlah alōkwa.

³¹ Dəram danğay na, amba ndəhay ma səra Yesu Kəriste ba da *Jude a sərdamaya banay ba. Dəram danğay saya, amba cek masa yah ma da handatara a ndəhay nga Yesu da Jeruzelem heyey na, a təbmara ta meesəmey. ³² Anda keđe, da Gazlavay ta təba la na, ya wusey la fa akwar ta meesəmey. Da yah ma wusey la na, ya məskey vaw la nekədey da wuzlah akwar. ³³ Anja Gazlavay, ndaw ma handawa zazay mandaw mandaw a ray ndəhay, nga njeý ta akwar tabiya. *Amen.

16

Pawl a catar har a ndəhay siya da Rawm

¹ Ya faa guzlkwar da ray dam-mama aləkwa Febe, ngwas ma jənta ndəhay daa *mecəmey-ray nga ndəhay nga Yesu da Senkəre. ² Təbmara ngwas aha maaya maaya ta mezəley nga Bay aləkwa Mahura. Təbmara na, anda ndəhay nga Yesu ma təbam ndəhay. Da cek fa vəda daa ba na, jənmara maja anğa ta jəney ndəhay la ga. Kwa yah may, ta jənya la.

³ Camatar har ngada ata Pəriskə ta zel e Akilas. Ara ndəhay masa ala ma kam sləra nga Yesu *Kəriste bama. ⁴ Ara ndəhay masa ma vəldamara ray ata la amba a ləhdamaya daa meməcey. Ya fa katar suse ga. Ma katar suse he na, yah daada ba, ama ndəhay cəpa masa daa mecəmey-ray nga ndəhay nga Yesu Kəriste masa *Jəwif hay ba fa kamatar suse may.

⁵ Camatar har a ndəhay nga Yesu masa ma kusam da way ata.

Camar har a Epayinet, jam aɗaw masa yah ma wuɗa kalah, ndaw masa ma tɔɓa mey nga Kɔriste ngeeme daa hwayak nga Azi.

⁶ Camar har a *Mari, ngwas masa ma kakwar slɔra la ga.

⁷ Camatar har ngada ata Andɔrawnikus ta Juniya. Ara sɔkway aɗaw hay, ya ta zɔmam dangay la bama. Ata na, ara ndɔhay meslɔrey nga Yesu masa ndɔhay ma sɔrmata maaya maaya. Ata na, a tɔɓmara mey nga Kɔriste teeseɗ da ray aɗaw.

⁸ Camar har a Ampɔliyatus, jam aɗaw masa yah ma wuɗa kalah daa mecɔmey-ray nga ndɔhay nga Yesu Bay Mahura.

⁹ Camar har a Urbeɲ, ndaw masa alɔkwa ma kakwa slɔra nga Kɔriste bama. Camar har saya ngada jam aɗaw Estakis.

¹⁰ Camar har a Apel, ndaw masa ma sɔrey banay ga maja Kɔriste, ama ta njeɲ la aɲga ndaw nga Yesu fara fara cɔɲga.

Camatar har ngada ndɔhay da way Aristawbul may.

¹¹ Camar har a sɔkway aɗaw Herawdiyaɲw.

Camatar har ngada ndɔhay daa sɔkway nga Narsis ma tɔɓmara mey nga Bay Mahura.

¹² Camatar har ngada ata Tɔrifen ta Tɔrifawz, ndɔhay masa ma kam slɔra la ga ngada Bay Mahura.

Camar har may ngada jam aɗaw Persit, masa yah ma wuɗa kalah. Ara ngwas ma key slɔra la ga ngada Bay Mahura.

¹³ Camar har ngada Rufus, ndaw masa fa sɔpa mey nga Gazlavay ta cɔveɗ e. Camar har a mamaha masa ma wadaya vaw anda aɲga mamay.

- ¹⁴ Camatar har ngada ata Asinkərit, Fəlegwan, Hermes, Patərawbas, Hərməs, asaya, camatar har ngada məlmən hay daa mecəmey-ray nga ndəhay nga Yesu masa ata bama.
- ¹⁵ Camatar har ngada Filalagw, Juley leŋ Nere ta damamaha. Camar har ngada Awlimpas, asaya, camatar har ngada ndəhay nga Yesu masa ata bama.
- ¹⁶ Cam har da wuzlah akwar cəpa pal pal, akwar məlmən hay daa Yesu Kəriste. Ndəhay daa mecəmey-ray nga ndəhay nga Kəriste cəpa a camakwar har.

Mey nga madagway-dakw

¹⁷ Məlma adaw hay ya fa kakwar ambahw, pam leŋgesl ta ndəhay ma handamawa mewudkey-dəy a wuzlah akwar maja a da nəsmara meesərkey masa akwar ma cəndamara da ray *Kəriste. Ka da njam ta ata daa slam a ba. ¹⁸ Fara fara, səkway nga ndəhay anda ŋgene na, fa kamar sləra a Kəriste Bay aləkwa Mahura daa ba, ama a kam sləra na, maja hwaɗ ata daada gway. Faa zəɗdamata ndəhay masa ma səra cek ba ta mey ata hay maaya maaya masa ma betey ndəhay. ¹⁹ Ndəhay tabiya a sərmara akwar fa namar ray ngada Bay Mahura, ara maja ŋgene, ya faa səmey ga da ray akwar. Cek mahura na, pam leŋgesl nga wunkey cek masa maaya ta maaya ba. Cek masa maaya ba na, ka da kamara ba. ²⁰ Gazlavay, ndaw ma handawa zazay a ndəhay na, a fəna *Satan la ta gədan, a da pa Satan a asi salay akwar. Anja maaya nga Bay aləkwa Mahura Yesu nga njeŋ ta akwar.

16:16 16.16 1Kwr 16.20; 2Kwr 13.12; 1Tes 5.26; 1Pi 5.14 16:17 16.17 Mt 7.15; 2Tes 3.6; Tit 3.9-10; 2Jh 10 16:18 16.18 Fəl 3.19; Kwa 2.4 16:19 16.19 1.8 16:20 16.20 1.7

²¹ Timawte, ndaw masa ala ma kam sløra cew e, a cakwar har. Ndøhay aɗaw hay ata Lusiyus, Jasarjw leŋ Sawsipater a camakwar har may.

²² Yah Tertiyus, ndaw ma wuzlala mey nga Pawl tabiya daa leeter keɗe, ya fa cakwar har ta mezøley nga Bay Mahura Yesu, ndaw masa ma cømndakwar.

²³ Gayus, ndaw masa yah ma njeý da way aŋga a cakwar har. Ara ndaw masa ndøhay nga Yesu ma kusam da way aŋga nga dørey danɗay. Eraste, ndaw ma kørza dala nga ŋgwamna daa berney feɗe, ta mølma aløkwa Kartus a camakwar har may.

[²⁴ Anja maaya nga Bay aløkwa Mahura Yesu Køriste nga njeý ta akwar tabiya. *Amen.]

Mehølmey Gazlavay

²⁵ Hølmakwa Bay Gazlavay. Aŋga na, a gwa a vølkwar gødan nga njeý daa cøvedɗ aŋga ta fa *Mey-maaya-mawiya masa yah ma wuzdatara a ndøhay da ray Yesu *Køriste. Zleezle na, Mey-maaya-mawiya ha maɓadakaya fa dey nga ndøhay. ²⁶ Ama wure keɗe na, mey a ta wuzwa cay ta fa ndøhay ma tøla mey aŋga ma wuzlamara zleezle da ray Køriste. Anda keɗe, søkway hay masa *jøwif hay ba da bøla tabiya ta jøkam slømay fa mey a la anda Gazlavay ma løvey, Gazlavay masa aa ta dey nga sørmataw. A wuɗey ndøhay tabiya a jøkam slømay fa Mey-maaya-mawiya ha, amba a tøɓmara, a namar ray.

²⁷ Anja ndøhay nga hølmamara Gazlavay nga sørmataw! Ara aŋga pal taava aŋga, ndaw ma søra cek. Hølmakwa maja Yesu Køriste. *Amen.

16:21 16.21 Timawte: SNM 16.1 16:23 16.23 Eraste: 2Tm 4.20 16:25
16.25 Ef 1.9; 3.4-5; Kwa 1.26 16:26 16.26 1.2, 5 16:27 16.27 11.36; Fø1
4.19-20; 1Tm 1.17; Jud 25; CWJ 4.11

Mejəwey-mey Mawiya
Mofu-Gudur: Mejəwey-mey Mawiya New Testament
Le Nouveau Testament en langue Mofu-Gudur (Cameroun)

copyright © 2007 Wycliffe Bible Translators, Inc.

Language: (Mofu-Gudur)

Contributor: Aramaic Bible Translation, Inc.

All rights reserved.

2020-11-19

PDF generated using Haiola and XeLaTeX on 14 Jun 2022 from source files dated 24 Nov
2021

2b021919-36cf-59da-a35f-10c5e5548811